

唐◎天竺沙門般刺密帝
清◎浙水慈雲灌頂沙門續法集

譯

大勢至菩薩

念佛圓通章疏鈔



引

念東高先生千里東余。自謂年來一味淨土。娑婆境風浩浩。眞如喆草堂青。皆不免蹉跌。勉余留心此件。余偶舉示百亭法師。而法師先有勢至念佛章疏鈔。在余案頭。二人取卷重閱。盡然興嘆。謂高先生以身踐爲救時之藥語也。遂命兒子募資刻之。刻既竣。法師復謂余。弁其首。余惟華嚴大經、德雲首宣念佛法門、馬鳴菩薩立論之祖、念佛與止觀並重。而楞嚴爲譚性之書。然勢至念佛一章。列在圓通。禪宗下。不能抑蓮宗爲非歸源見性之途也。明矣。今彌陀疏鈔、龍舒淨土等文。布在禪林。惟勢至章。僅附本經。而未有耑行之疏。法師詮文釋義。勒成一書。爲震

且人添一重往生舟筏。不可謂非淨土之功臣也。又明矣。遂以此意復高先生而繼之以臆說云。蓮師云。念一佛名。換彼百千萬億之雜念也。即念即空。居然本體。非於念外。別得菩提。又云。執持名號。至於一心。則復還空寂之體。又云。當知淨土唯心。更無外境。自性還歸本體。是願生彼國義。如是則蓮師雖極力主張西方淨土。而不遺宗門見性之旨。彰彰如是矣。則謂見性爲淨土指歸。而淨土爲見性入路。未相違也。見性則掉臂皆淨土。而蓮臺自不消說。不見性則淨土非了手。而種因要自不退。然則見性與不見性。而念佛修淨土。皆不可忽也。此義似本章所未及言。既以復於高。遂筆之。此以質諸真能念佛人。爲何如也。

康熙庚申長至錢唐戴京曾書

音釋

盡

音津、與盡同。氣液也。即傷心歎氣之意。

崙

古端字。專也。

大勢至菩薩念佛圓通章疏鈔

大勢至菩薩念佛圓通章疏鈔

大佛頂首楞嚴經大勢至菩薩念佛圓通章

唐天竺沙門般刺密帝譯

大勢至法王子、與其同倫、五十二菩薩、即從座起、頂禮佛足、而白佛言。

我憶往昔恆河沙劫。有佛出世、名無量光。十二如來、相繼一劫。其最後佛、名超日月光。彼佛教我、念佛三昧。譬如有人、一專爲憶、一人專忘。如是二人、若逢不逢、或見非見。二人相憶、二憶念深。如是乃至、從生至生、同於形影、不相乖異。十方如來、憐念衆生。如母憶子。若子逃逝、雖憶何爲。子若憶母、如母憶時。母子歷生、不相違遠。若衆生心、憶佛念佛。現前當來、必定見佛。去佛不

遠。不假方便、自得心開。如染香人、身有香氣。此則名曰香光莊嚴。我本因地、以念佛心、入無生忍。今於此界、攝念佛人、歸於淨土。

佛問圓通、我無選擇。都攝六根、淨念相繼。得三摩地。斯爲第一。楞嚴經云。佛告阿難。若復有人、身具四重十波羅夷。瞬息即經此方他方阿鼻地獄。乃至窮盡十方無間。靡不經歷。能以一念將此法門、於末劫中開示未學。是人罪障、應念銷滅。變其所受地獄苦因、成安樂國。則此章經、誠爲銷罪之巨冶、愈病之靈丹、修心之捷徑、求生之要術也。若能常持、無苦不除。無樂不與。無願不遂。無果不得。凡見聞者、宜三復焉。

日誦式

人有三等。一者極閒人。應當晝夜六時、持經念佛。二者半閒半忙人。應當每日晨昏二時、一心持念。三者極忙人。應當每日晨朝一時、專心持念。誦持之式、先本師三稱。次舉勢至章一遍。往生咒三遍。讚佛偈一遍。佛名百聲。千聲萬聲隨意。三菩薩名。各十聲。後發願回向偈一遍。未誦前、已誦後、俱要對聖像前、合掌三禮。如無佛像、對經對空禮拜亦可。果能如此常行無間、佛必哀憐。凡有求願、無不遂者。臨命終時、佛與聖衆、放光接引、徑生極樂矣。行者當生信願、切勿疑忽。此明每日經佛並舉式也。若單佛名、極閒者、除六時外、應當時刻

念佛無間。半閒半忙者、應當營事已畢、即便念佛。極忙者、應當忙裏偷閒、十念念佛。此方名爲不虛度也。盡此一生、一日無有暫廢。則自念佛心口、當必成佛心口。經云、行與佛同、受佛氣分。入如來種、親爲佛子。不其然哉。

南無本師釋迦牟尼佛

三稱 次舉勢至章畢。接往生咒。

南無阿彌多婆夜 一 哆他伽跢夜 二 哆地夜他 三 阿彌利都婆

毘 四 阿彌利哆 五 悉耽婆毘 六 阿彌利哆 七 毘迦蘭諦 八 阿彌

利哆 九 毘迦蘭哆 十 伽彌膩 十一 伽伽那 十二 枳多迦隸 十三 莎婆訶

四十

不思議神力傳云。持咒之法、淨身漱口、然香佛前。晝夜六時、

各誦二十一遍。能滅五逆謗法等罪。誦滿三十萬遍。即見阿彌陀佛。彌陀疏鈔云。若有善男子、善女人、能誦此咒者。阿彌陀佛常住其頂。日夜擁護。無令怨家而得其便。現世常得安隱。臨命終時。任運往生。次舉讚佛偈

阿彌陀佛身金色 相好光明無等倫

白毫宛轉五須彌 紺目澄清四大海

光中化佛無數億 化菩薩衆亦無邊

四十八願度衆生 九品咸令登彼岸

南無西方極樂世界大慈大悲阿彌陀佛

百千萬聲隨意

南無觀世音菩薩 南無大勢至菩薩

南無清淨大海衆菩薩

各十稱

後舉發願回向偈

我今稱念阿彌陀。真實功德佛名號。惟願慈悲哀攝受。證知懺悔及所願。往昔所造諸惡業。皆由無始貪瞋癡。從身語意之所生。一切我今皆懺悔。願我臨欲命終時。盡除一切諸障礙。面見彼佛阿彌陀。即得往生安樂刹。願以此功德。莊嚴佛淨土。上報四重恩。下濟三途苦。若有見聞者。悉發菩提心。盡此一報身。同生極樂國。十方三世一切佛。一切菩薩摩訶薩。摩訶般若波羅密。

一遍 此當對佛跪念。念畢起身。三禮而退。

偈云。一日無常到。方知夢裏人。萬般將不去。唯有業隨身。如何是萬般將不去。官爵財寶、屋宅田園、衣服飲食、乃至嬌妻

愛子、無常到來、都是將不去者。如何是唯有業隨身。人生所造貪瞋癡慢、五逆十惡、惡業戒定慧施五戒、十善善業。無常到來、盡皆緊隨你者。楞嚴云。臨命終時。未捨煖觸。一生善惡。俱時頓現。惡者、便感三途苦報。善者、便感人天樂報。若善心中、兼有信願念佛求生、便現極樂佛土境相。行願品云。是人終時。一切諸根、悉皆散壞。一切親屬、悉皆捨離。一切威勢、悉皆退失。象馬車乘、珍寶伏藏、無復相隨。唯此願王、於一切時引導其前。一剎那中、即得往生極樂世界。見彌陀佛、及諸聖衆。既然如是、何不趁此強健之時、努力勤修善導云。假饒金玉滿堂。難免衰殘老病。恁汝千般快樂。無常終是到來。惟有

徑路修行。但念阿彌陀佛。設待臨終方悔。悔之於後。將何及乎。奉勸諸人。及時修進。生死事大。無常迅速。慎勿以此爲分外也。勉之勉之。

又淨業人。備三資糧。一者信。信輪迴最苦。信念佛最妙。信此土修行。難成道果。信願生彼土。乃至十念。決得往生。信報生人天。福盡還墜。信一生樂土。永不退轉。當成正覺。信一稱佛名。能滅八十億劫生死重罪。信念佛之人。彌陀攝取。病中救護。命終來迎。二者願。願消業障。願滅衆苦。願心開。願見佛。願淨業成。願生安養。願授記。願度生。三者行。身禮像。口稱名。心觀想。俱要專一。絕無散亂。解知信願時。蓮華種植也。專念時。

蓮華出水也。功成時、蓮華敷空也。設起疑退心、蓮華又萎矣。由是晝夜六時、無有一念貪戀在娑婆。凡起居衣食、語默動靜、皆不忘淨土。至於臨命終時、應當念佛發願、不得怕死貪生。常自念言、我現在身、衆苦交纏、不淨流溢。若得捨此、華池託質、受無量樂、事極稱意。如脫臭弊之衣、得著珍御之服。萬緣放下、身心解脫。纔有病患、莫論輕重、便念無常、一心待死。即囑一切人、凡來我前、爲我念佛。不得雜說世務、家緣長短。再延法師、頻來誠勸。依經指示。及到病重捨報之際、家人親屬、不得哭泣。并發悲歎懊惱之聲。猶恐惑亂心神、忘失正念。但高聲朗念阿彌陀佛。守令氣絕神逝、方可舉哀。若如此者、

萬求萬生、必無疑也。復有遇障難者、不得正念往生。如偏風失語、狂亂失心。水火雷擊、蟲獸鬼噉、毒藥陣亡、怨賊王難。亦應預懺、必蒙佛護。蓋念佛者、有六勝益。一諸佛菩薩護念。彌陀住頂放光。諸天神將、晝夜冥加。二惡鬼毒藥、皆不能害。三災八難、咸悉消除。三宿障冰清、怨命解脫。四氣力充滿、無諸橫病。五睡夢吉祥、見佛色像。無有非人奪其精氣。六現爲一切禮敬、臨終三聖接引。故知日常一意念佛、即爲預備不虞法矣。如人入城幹事、必先覓下安處。抵暮昏黑、則有投宿之地。先覓下處者、預修淨業也。抵暮昏黑者、大限到來也。有投宿地者、生蓮華中、不遭障難也。人若依此用心、臨終定得往

生此又爲修淨土者之至囑也。

慈雲香嚴行者續法述勸

大勢至菩薩念佛圓通章疏鈔

楞嚴經勢至念佛圓通章疏鈔卷上

清浙水慈雲灌頂沙門續法集

釋此一章大分爲三 初通序大意 二開章釋文
三皈命回向

(甲) 初通序大意 二分 初詳申旨趣 二略釋經題

(乙) 初詳申旨趣 三分 初通序念佛宗致 二別顯此章
所詮 三引取勝益勸修

(丙) 初通序念佛宗致

大矣哉、念佛之爲法門也。大小並收。利鈍均攝。事理圓融。性相無礙。即佛是心、無一心而非心佛。即心是佛、無一佛而非佛心。

心一憶也。佛佛全彰。佛一稱也。心心頓顯。無有心外佛。爲心所憶。亦無佛外心。爲佛所稱。衆生念佛。佛在衆生心內。佛念衆生。衆生在佛心中。是心作佛。心不念而佛不作。即佛顯心。佛不稱而心不顯。則知念佛一門。誠爲見性成佛之妙法矣。

大下分二。先釋又三。初總明該攝大矣哉者。能讚詞。亦是發語之端也。念下。所讚法。初句標體。念佛別也。法門通也。大等四句。釋相。初二句。人也。大小約乘。利鈍約根。並收均攝者。化導小乘。回小向大。勉進大乘。捨權歸實。使上根三心。一至誠心。二深心。三圓發。直入無生。令下根十念成功。亦生彼國。次二句。法也。事理約行。性相約諦。圓融無礙者。下愚著事而迷理。小智

回向發願心。

執理而遺事。今則通乎理事。依理修。則證真諦。而見自性彌陀。依事修。則證俗諦。而生極樂相土。即下二別顯不二中。先心佛不二。初四句約性起。心佛。開五句。一心外佛。佛外心。二心內佛。佛唯心。三心即是佛。佛即是心。四心非是佛。佛非是心。五心佛圓融。無障無礙。五教如次配知。今明第三句義也。此之心佛。全體遍收。如金與器。以金收器。器無所遺。以器攝金。金無不盡。心一下八句。約修顯。心憶佛。佛稱心。皆明修也。心憶佛彰。心即是佛故。佛稱心顯。佛即是心故。無爲心憶。心外無佛故。無爲佛稱。佛外無心故。華嚴回向品云。無有智外。如爲智所入。亦無如外智。能證於如。正此義也。衆生下。後三

無差別。謂心佛生、三無別也。初四句、正明無別。衆生念佛者、諸佛心內衆生、念衆生心中諸佛也。佛在生心內者、衆生心外、更無別佛。以佛真心、即衆生真心故。此明因門攝法無遺也。故云衆生念佛、現前當來、必定見佛。華嚴亦云、應知自心、念念常有佛成正覺。何以故。諸佛如來、不離此心成正覺故。佛念衆生者、衆生心內諸佛、念諸佛心中衆生也。生在佛心中者、佛真心外、更無衆生。以衆生真心、即佛真心故。此明果門攝法無遺也。故云十方如來憐念衆生、如母憶子。佛性論云、一切衆生、悉在如來智內。以一切衆生、決定無有出如如境者、並爲如來之所攝持。據清涼疏、開成四句。一諸佛心外、

無別衆生。二衆生心外更無別佛。三佛心生心。兩存齊現。四生心佛心互奪雙亡。今且約前二句明也。是心下四句躡前反顯。心本是佛。由不覺而佛隱。若欲作佛。須當念心。故起信謂衆生本覺。與佛本覺。無有二體。若不念心。難成佛矣。佛本是心。因無明而心暗。若欲顯心。須當念佛。故華嚴謂佛智廣大。遍衆生心。衆生語言。皆悉不離如來法輪。若不稱佛。難明心矣。則知下次結彌陀。即是自性淨土。全唯一心。離心性外。毫無可得。若能憶念。即顯本性佛矣。起信云。法界一相。即是如來平等法身。性佛一顯。果佛自證。故圭山云。今知心是佛心。定當作佛。不其然乎。設離念佛門外。而欲速見性成佛者。

是捨其近易，以求諸遠難也。

（丙）二別顯此章所詮

所以十二如來號曰三昧。勢至菩薩標爲圓通。三昧則總攝諸禪。圓通則具足萬行。一心頓實，不亦宜乎。

所以下分爲三。初正顯。所以者承前起後之辭。十二如來號念佛爲三昧者，凡夫垢心混若黃河，外道妄想逸如奔馬。故說三昧欲令返染成淨，捨散入寂也。勢至菩薩標念佛爲圓通者，小乘七生斷惑證真，權教三祇具因滿果，故說圓通欲令速證疾成，圓超直入也。三昧下二重揀，謂此三昧總攝世出世間一切禪定，揀非餘三昧也。如一巨冶鑄成千器，圓通

具足八萬四千一切觀行。揀非餘圓通也。猶阿伽陀、總愈萬病。末二句、三勸誡。三昧、實教所詮。圓通、頓教所詮。學頓實教者、是其所宜也。又上顯圓義、此兼顯頓實。衆生念佛定當成佛、實也。起信云、專念阿彌、修善回向、願生彼界、終得見佛。華嚴云、臨命終時、諸根散壞、唯此願王、引導其前、即得往生、見彌陀佛。蒙佛授記、不久當坐菩提道場、成等正覺。衆生憶佛、現前即見、頓也。佛藏經云、無覺無觀、名爲念佛。無想無語、是名念佛。摩訶般若云、菩薩摩訶薩念佛、不以色念、不以受想行識念、以諸法自性空故。今兼顯此。故頓實者、宜應學也。

(丙) 三引取勝益勸修

聞說佛名、威光證入於無盡。憶想佛境、德雲解脫於多門。有此勝益、應當信行。何得自暴自棄、不願不修耶。

聞說四句、初引明。說佛名者、華嚴云。勝雲佛現時。寶華林中、出說三世一切諸佛名號音聲。時彼如來、於衆會中、說普集一切三世佛自在法修多羅。入無盡者、華嚴云。勝雲佛所、證得一切諸佛功德輪三昧、證得一切佛法普門陀羅尼。了知一切佛決定解莊嚴成就海。了知無邊佛現一切衆生前神通海。了知一切佛力無畏法。於善眼佛所、即得念佛三昧、名無邊海藏門。如是等十千法門、皆得通達。憶佛境者、華嚴云。德雲告善財言。善男子。我唯得此憶念一切諸佛境界智慧。

光明普見法門。多解脫者。華嚴云。所謂智光普照念佛門。乃至住虛空念佛門等。二十一種。有此下。二結勸。二初正勸。諸餘法門。淺則上根不被。深則下根絕分。唯此一法。利鈍兼收。如水清珠。到處便益。故當信受行持。念佛如種穀。自心如家田。信如信栽。此種定得成穀。願如知此佳種。一心求穀。行如欣求得穀。作耕耨事。何得下。二結責。十界因果。皆唯心現。若一念心。瞋恚邪淫。即地獄界。慳貪不施。即餓鬼界。愚癡暗蔽。即畜生界。我慢貢高。即修羅界。堅持五戒。即人法界。精修十善。即天法界。證悟人空。即聲聞界。知緣性離。即緣覺界。六度齊修。即菩薩界。真慈平等。即佛法界。今此教念佛者。欲人念

我自心、成我自佛。云何捨自心佛。孤佛教耶。如來不思議境界經云。菩薩了知諸佛、及一切法、皆唯心量。得隨順忍。捨身速生極樂淨土。照律師問。經云。是心作佛、是心是佛。心既是佛、何須念他佛耶。答。祇由心本是佛、故令專念彼佛。梵網戒云。信知一切衆生、皆有佛性。我是未成之佛、諸佛是已成之佛。汝心佛者、未成佛也。彌陀佛者、已成佛也。未成佛者、久沈欲海、具足煩惱、杳無出期。已成佛者、久證菩提、具足威神、能爲物護。是故諸佛、勸令念佛。即是以我未成之佛、求他已成之佛、而爲救護耳。衆生若不念佛、聖凡永隔、父子乖離、長處輪迴、去佛遠矣。所以文殊普賢等諸菩薩、皆願念佛往生、況

我凡愚人耶。又彼螟蛉、尚聽教成。可以人而不如蟲乎。不願自棄。迷也甚矣。

(乙) 二略釋經題

楞嚴者、一切事究竟堅固也。乃大部之總名。圓通者、聖性法門、無不通也。是一章之別目。勢至者、啓教之人也。念佛者、修行之法也。文雖一十二行、義括淨土諸典。有教有機、有法有喻。生佛感應以遍含。自他因果而該徹。作心境之月燈。爲聖凡之舟楫。故言楞嚴經勢至念佛圓通章。

楞下、先釋名。一切事、三科七大也。究竟、空也。堅固、不空也。合二、空不空也。蘊處界大、本如來藏。故事事究竟堅固、名楞嚴。

定。既住法位、世相常住。故此亦名健相三昧。聖性、舉理法門、約教影略行果、可知。正顯四法、互相圓遍該通也。依止成定、名爲楞嚴。依觀成慧、號作圓通。別目者、以勢至念佛圓通乃修道二十五圓通中一也。勢至下、亦影略義具。應云能啓能修、勢至人也。所啓所修、念佛法也。文下、後結歎、二。先別歎。彼佛教我念佛、機教也。母子形影染香、法喻也。如來憐念衆生、衆生一心憶佛、生佛感應也。我因念佛入忍、今攝念人歸淨、自他因果也。心境月燈者、依我自心、念彼佛境、則佛境可彰。託彼佛境、念我自心、則自心易顯。此之彰顯、皆憑月燈教法、以照見也。心外有境、小教也。境唯是心、始教也。即心即境、終

也。非境非心、頓也。心境無盡、圓也。即所詮法、月燈、喻能詮教。聲名句義門、如螢燈、小也。攝境唯心門、如火燈、始也。理事無礙門、如星、終也。會相歸性門、如月、頓也。普融無盡門、如日、圓也。今約中二以說。聖凡舟楫者、念名號佛、受持皈戒、越於三途、下下品生、名爲人乘。其猶艇船、纔過谿澗。念色像佛、修行禪善、越於四洲、生下品蓮、名爲天乘。其猶舢船、出小河港。念應化佛、觀四真諦、越於三界、生中品蓮、名聲聞乘。其猶艤艦、過於大湖。念受用佛、了悟因緣、證二涅槃、生上品蓮、名緣覺乘。其猶艦艦、過於大江。念法性佛、智悲並運、萬行繁興、成無上道、超凡小界、上上品生、名菩薩乘。其猶艤觸、直過大海。又

持名念佛如特舟、聲聞乘也。觀像念佛如方舟、辟支佛也。觀想念佛如維舟、菩薩乘也。實相念佛如造舟、佛乘也。聖凡、即所化人。舟楫、喻能化法。故言句次總結。

(甲) 二開章釋文二分 初略標 二詳解

(乙) 初略標

將解此經、五門分別。一教起因緣。二藏乘教攝。三宗趣旨歸。四略釋題名。五詳解文義。

初二句總敘。一下別列。此例般若疏意、略開五章。前三義門、後二正釋。

(乙) 二詳解五分 初教興 二藏攝 三宗趣 四釋題

五解文

(丙) 初教興

初教起因緣者。智度論云。如須彌山。非無因緣。非少因緣。令得振動。念佛教興。亦復如是。具多因緣。一指出捷徑修行門路故。二直示當人念自心佛故。三欲令悟入佛之心性故。四爲顯生佛心無差別故。五度脫凡外橫超三界故。六接引權小圓成佛果故。七充足三輩無有疑悔故。八利益今後周遍無盡故。九頓攝六根證圓通境故。十疾空障惱定生佛土故。

初句標牒。智下釋義。二先引證。如須彌下喻也。念佛下合也。一下次正釋。楞嚴云。初心入三昧。遲速不同倫。故知餘門學

道、紆迴險難、猶如蟻山。念佛一門、古稱徑路、好似風水。善導云。唯有徑路修行、但念阿彌陀佛。況今持名、徑而又徑者也。若欲一生取辦、當於是法留心。二下、觀經云。是心作佛、是心是佛。諸佛正徧知海、從心想生。是故教人念佛、即念自心佛也。三下、佛心性者、楞嚴云。我以不滅不生、合如來藏。而如來藏、唯妙覺明、圓照法界。無差別論云。此心性明潔、與法界同體。如來依此心、說不思議法。則知佛以如來藏淨法性爲心也。令悟入者、起信云。眞如自體相者、凡夫諸佛、無有增減。楞嚴富樓那言。我與如來、寶覺圓明、眞妙淨心、無二圓滿。觀經云。汝等心想佛時、是心即是三十二相、八十隨形好。是故衆

生念心佛時、即能悟入佛心性也。四下、無差別論云。衆生界不異法身、法身即是衆生界。觀經云。諸佛如來、是法界身、入一切衆生心想中。下云。若衆生心憶佛、現前必定見佛。則此法門、能顯心佛衆生、三無差別也。五下、凡夫外道、由見思惑、起業感報、輪轉不休。依餘法修、直至惑盡、始得出離。名爲豎出三界。唯念佛門、帶惑往生、名爲橫出三界。如蟲在竹、豎則歷節難通、橫則一時透脫。桐江法師云。豎出者、依諦緣度、歷涉地位。如取科第、須有才學。如歷任轉官、須有功效。橫出者、念佛法門、如人廕敘、功由祖父他力、不論學問有無。又如覃恩普轉、功由國王、不論歷任淺深。六下、菩薩六心、墮落聲聞、

塵劫不回。猶菴羅華、魚子一般。因中雖多、結果者少。若能念佛、圓發三心。自然轉權成實、回小向大。如彼白衣驟貴、平地升仙者然。故大本云。菩薩欲令衆生、速疾安住無上菩提者、應當起精進力、聽此法門。又華嚴十地、始終不離念佛。圓教登地尚爾、況權小初心人耶。七下、上品利根、聞小教則悔。下品鈍根、聞大教則疑。所以華嚴會上、聲聞絕分。阿含時中、菩薩不被。今此念佛一法、如萬應膏、毒病皆愈。似及時雨、藥木並茂。故得利鈍盡攝、上下均收也。八下、利今、即佛在機宜。利後、即滅後聞見。下云。今於此界、攝念佛人、歸於淨土。觀經云。如來今者、爲未來世一切衆生、爲煩惱賊之所害者、說清淨

業。故如如意珠、利濟無盡也。九下、一切衆生、迷常住心、用諸妄想、循諸色聲、違圓通境。今念佛也。六根都攝、守於真常。常光現前、圓通境發。雖不欲證、不可得也。故華嚴解脫長者云。知一切佛、猶如影像、自心如水。水清而靜、月現全體。又偈云。菩薩清涼月、常遊畢竟空。衆生心垢淨、菩薩影現中。則知衆生淨念彌陀、定放光明。心水不淨、菩薩圓通月境、亦不現矣。十下、末法修行、多諸障礙。邪魔嬈亂、佛道難成。今修念佛三昧、承佛願力、威神疾除煩惱、頓破無明。五蘊魔銷、三身佛現。當生極樂佛土、成真應二果矣。如大明燈、然於室中。不唯破千年暗、而且見種種物。然此十因、生起有序。初以入道多門、

難易各別。出念佛法，最爲徑捷。二所以徑捷者，爲念自心佛故。三由念心佛，方能成佛心故。四佛心若契，生佛同體，無有二故。五既無二別，豈有凡外不度脫故。六豈獨凡外，亦接權小人故。七豈唯五乘，亦充足一切善惡衆生故。八豈但現今，亦普利未來，無有盡故。九濟度如是廣大者，爲圓通故。十有作之修，終成敗壞。現既圓通，當必見佛歸淨土故。又由定生佛土，所以指出捷徑門路，令預修行，疾成佛故。如此終始連環，猶同鉤鎖。此教之興，非無因也。

(丙) 二藏攝

二藏乘教攝者，謂三藏之中，契經藏攝。二藏之內，菩薩藏攝。三

乘之中、大乘所攝。五教之內、後三教攝。

二句標章。謂下釋相。三藏者、一修多羅。此云契經。即經藏。詮於定學。二毘奈耶。此云調伏。即律藏。詮於戒學。三阿毘達磨。此云對法。即論藏。詮於慧學。今此經者、屬於經藏。自始至終、專說念佛三昧故。二藏者、一菩薩藏。詮示菩薩理行果故。二聲聞藏。詮示聲聞理行果故。今此經者、屬菩薩藏。此經演說菩薩念佛圓通法故。三乘者、一小乘聲聞。謂四諦法門。運載衆生。出於三界。到涅槃城。成阿羅漢。猶如羊車。二中乘緣覺。謂因緣法門。運載衆生。過於四空。居寂滅舍。成辟支佛。猶如鹿車。三大乘菩薩。謂六度法門。運載衆生。超凡小境。直至無

上菩提、大般涅槃彼岸、成於佛果、猶如牛車。今此經者、屬於大乘。以如來憐念衆生、勢至攝念佛人、安樂諸乘、度脫九界故。五教者。一小教、唯談人空故。二始教、但明法空故。亦名分教。但說法相故。三終教、復說中道故。亦名實教。多談法性故。四頓教、唯辨真性故。五圓教、唯說法界故。今此經者、屬後三教。下云。二憶念深、母子歷生、不相違遠、終也。漸漸念時、終當成佛故。下云、以念佛心、入無生忍、不假方便、頓也。知佛即心、疾成佛道故。下云、都攝六根、淨念相繼、得三摩地、圓也。了三無別、圓通法界故。準知此經教義、深廣幽遠、非淺近矣。

(丙) 三宗趣

三宗趣旨歸者。有總有別。總以憶佛念佛爲宗。見佛入忍。心境圓通爲趣。別有五對。一教義、以教說爲宗、令達義爲趣。二事理、舉事相爲宗、詮顯理爲趣。三境智、三佛境爲宗、二觀智爲趣。四行位、信願行爲宗、入不退爲趣。五因果、以因行爲宗、克果德爲趣。

三句牒門、謂宗旨歸趣也。當經所崇曰宗、宗之所歸曰趣。若不識宗、無從趣向矣。有下釋義。教說者、即念佛教門也。達義者、謂了達教中所詮心境緣念、生佛感應、染香入忍、自他生土之義也。事理、義中所具者、謂崇尚念佛等事、其意云何。正欲彰顯彌陀自性、淨土唯心之至理也。境智、理內開者。境、即

所觀之理智。是能觀之心。佛之圓融三身。真境也。事一心理。一心真觀也。行位隨智起者。信願行。三資糧也。不退者。信淨土。離三界。位不退也。願見佛。念佛心。念不退也。行淨業。攝佛人行不退也。又信化佛教。超凡外道。信不退也。願報佛果。超二乘境。念不退也。行法佛理。超權修證。行不退也。起信疏云。約有三位。一信行未滿。未名不退。但以處無退緣。故稱不退。二信滿已去。入十住位。得見法身。住於正定。故名不退。三三賢位滿。入初地去。證遍滿法身。生無邊佛土。故名不退。由信成信不退。由願成住不退。由行成地不退。地論師云。住是證不退。行是位不退。向是行不退。地是念不退。由信成證。位。行。

成行願、成念也。因果、不退之所成者。因若不退、名爲真因。果若不退、名爲真果。信願佛土、攝根淨念、是不退菩提因行也。得三摩地、第一圓通。是不退菩提果德也。文有三重。憶念彼佛、因也。現當見佛、果也。念見近佛、因也。心開香嚴、果也。念心入忍、因也。攝人歸土、果也。如是五對、展轉相因、以爲生起。

(丙) 四釋題

四略釋題名者、有四對義。初總別。謂楞嚴三字、總稱也。總通彼大部故。勢等七字、別號也。別局此一章故。二教義。就前別中、分教義二。謂章之一字、是能詮教也。勢等六字、是所詮義也。三果因。就前義中、開此一對。謂圓通是果、所證境故。勢等是因、能修

觀故。四人法。就前因中。分成此對。念佛法也。即所稟法。勢至人也。是能宏人。依四對義。立斯名耳。

四下標牒。有下解釋。此句列也。初下釋也。總中亦影一對。楞嚴義也。局也。經字教也。通也。今不出者。恐混濫故。章屬能詮者。謂是圓通文字。念佛教章也。果因對。亦可名境智對。圓通境也。念佛智也。亦可名真俗理事性修寂行對。圓通真理性寂也。勢至念佛俗事修行也。四下念佛法者。念變化非受用佛。身化小也。念受用非變化佛。報自終也。念亦變化亦受用佛。報他始也。念非受用非變化佛。身法頓也。念圓通無障礙佛。身十圓也。勢至人者。得應化佛力。小勢至也。得功德佛力。始勢至也。得

智慧佛力、終勢至也。

此二報佛

得如如佛力、

佛法

頓勢至也。得無盡

佛力、

佛十

圓勢至也。此亦約教略釋、下更詳解。則知此題名內、

人法雙彰。因果並舉。理盡義周。故標章首。

(丙) 五解文

三分

初敘禮白儀

一

正陳所證

二

結答圓通

(丁) 初敘禮白儀

大勢至法王子。與其同倫。五十二菩薩。即從座起。頂禮佛足。而白佛言。

疏梵語摩訶那鉢。此云大勢至。思益云。我投足之處。震動三千大千世界。及魔宮殿。故名大勢至。觀經云。此菩薩行時。十方世界。一切震動。此菩薩坐時。七寶國土。一時動搖。亦名得

大勢。悲華云。願我世界。如觀世音。等無有異。寶藏佛言。由汝願取大千界故。今當字汝爲得大勢。亦名無邊光。觀經云。以智慧光。普照一切。令離三途。得無上力。若依本文。能念大勢佛。能攝六根。妄能接念佛人。故名爲勢至也。假此菩薩爲發起者。表念佛法門。能發智光。得大勢力。離三界苦。取淨土樂也。於法自在。名爲法王。從法化生。稱之爲子。悲華經云。往昔因中。彌陀作輪王時。觀音爲長子。勢至爲次子。今在極樂。居佛左右。助化一切。次補佛處。故名法王子也。與共也。倫類也。聲氣相應。名爲同類。五十二者。數也。表勢至念佛一門。能攝信等五十二位諸法行故。菩薩。具云菩提薩埵。肇云。菩提。佛

道名也。薩埵、秦言大心衆生。有大心入佛道、名菩提薩埵。賢首云。菩提、此名曰覺。薩埵、此曰衆生。以智上求菩提、用悲下救衆生、名菩提薩埵也。從座起者、師資尊卑、名分秩然。有所陳白、不應坐故。頂禮佛足者、以己上頂、禮佛足下。敬之至也。上皆身業。白佛言者、上示曰告、下啓曰白、是口業也。身口恭敬、意業可知。

鈔梵語下、釋人名也。先勢至中、初約行、中修自行也。由有智斷威勢、故能震動一切。亦名下、次約願、上求佛道也。由有想念勢力、故能取證淨土。亦名下、三約悲、下度衆生也。由有化導勢力、故能救拔三途。上二、自利。此一、利他。依本文者、上通

諸經釋名。此局當經釋也。能念三句。亦約上求、中修、下度、三義以釋。大勢佛者。指彌陀言。十方三世佛中。彌陀爲第一故。能念。非如衆生不求大勢佛。及斷苦法故。能攝。非如衆生六根攀緣六塵故。能接。非如衆生自利。不耐他榮故。有此三大德。威勢之至也。菩薩名實相稱。衆生無勢可知。於法下。次法王子。自在爲王者。王以自在爲義故。次補佛者。彼土彌陀佛後。次當觀音補位。觀音之後。次乃勢至補位。猶如儲君。暫居東宮。後必南面。紹王位也。與下三與同倫。易曰。同聲相應。同氣相求。故曰聲氣相應。若依華嚴。有八十四同。始從念慧趣覺。終至不虛出離。故名同類。如七十三。茲不繁錄。道不同。不相爲謀。同心言其臭。

如蘭。故云與同倫也。五下四、五十二信佛是心、信心作佛、即攝十信法行。住在三昧、觀佛實相、即攝十住法行。行念佛行、度念佛人、即攝十行法行。回念佛心、向佛心住、即攝十向法行。心地觀佛、地如佛地、即攝十地法行。憶佛念佛、去佛不遠、即攝等覺法行。心想佛時、是心即佛、即攝妙覺法行。則知超凡入聖、唯有念佛爲妙矣。菩下、五菩薩。初義約心、謂能如是憶佛、即成大道心衆生、名爲菩薩。次義約境、謂能以念佛心上求佛覺、下化有情、故名菩薩。從座下、釋敬禮也。意可知者、謂意若不恭敬、則身不避席、口不發言、以身口禮白、隨意主故。所以三業皆修敬者、表顯念佛、乃是一切世間希有難信。

之法也。

(丁) 二正陳所證二分 初詳引古佛教詔 二略述自己

修行

(戊) 初詳引古佛教詔二分 先總明佛出 次別示教道

(己) 先總明佛出

我憶往昔恒河沙劫有佛出世名無量光十二如來相繼一劫其最後佛名超日月光。

隨我者即自指法身不同情計我也明記不忘爲憶過去稱爲往昔恒河沙劫者約恒河中之沙以數劫顯其久也梵語佛陀此云覺者覺人之不覺也略開三義一自覺我空揀異

凡外。二覺他法空、揀異二乘。三覺滿俱空、揀異菩薩。出世者、無機不興、根熟則現也。如來者、從真如起來、成正覺也。十二者、大彌陀經云。無量光佛。無邊光佛。無礙光佛。無對光佛。炎王光佛。清淨光佛。歡喜光佛。智慧光佛。不斷光佛。難思光佛。無稱光佛。超日月光佛。無量者、實智照理、無限量故。無邊者、權智照事、無邊際故。無礙者、慈光與樂、無障礙故。無對者、悲光拔苦、無敵對故。炎王者、光音應化、得自在故。清淨者、離垢清淨、發光明故。歡喜者、令他受用、生大喜故。智慧者、以大智慧、破諸惑故。不斷者、常光不斷絕故。難思者、本光不思議故。無稱者、涌百寶光、不可稱故。超日月者、放一切光、超日月故。

俱名光者、因中念本覺佛、發明心光。果上成妙覺佛、現起身光故。十二如來、相繼一劫者、一約能念、表行者、十二時中、於自性佛、淨念相繼、打成一片。不得彈指頃、念世間五欲。則無量性光、自然發明也。二約所得、則轉十二類生、而成十二聖位。轉十二處妄想、而成十二處佛德也。然十二佛、乃古如來、非今彌陀。而其名號同者、以師資一道、古今不異。如釋迦觀音之類。

【鈔】我下、釋我等二句。我有四。一執見邪我、二自他慢我、三名字假我、四法身真我。世人具邪慢。學人具慢假。聖人是假真。今勢至乃法身大士、不同三乘、故唯真我。恆河亦云、殞伽河、

此云天堂來。河從高處來故。乃是無熱惱池流出。廣四十里。沙細如麵。佛在祇園說法。河近講堂。故凡言多。取以爲喻。梵語劫波。此云分別時分。俱舍云。時之極少。名剎那。時之極長。名爲劫。今取沙喻劫。多久可知。梵下釋有等六句。始本合一。名爲覺滿。我法空盡。名爲俱空。大彌陀下引經。無量下釋義。諸佛名號。取證不同。或因或果。或性或相。或悲智。或願行。此十二佛。皆以光分名者。蓋光有二。一智光。二身光。復有二義。一常光。二放光。又有二因。一是功德莊嚴。二是本願成就。今釋佛名。亦約此六義也。初二約二智。三四約二心。攝二因也。五六七八約四身。五是化身。六是法身。七是他受用身。八是

自受用身。即楞伽中應化佛。如如佛。功德佛。智慧佛也。九十、常光。十一、二放光。自性佛者。謂念自性佛也。不得念五欲者。觀經云。夫念佛者。不得一彈指間。念世五欲。是謂繫念。脫能如此。一無間雜。無量自性佛光。終得發明。超於日月也。十二類生者。謂胎、卵、濕、化、有色、無色、有想、無想、非有色、非無色、非有想、非無想也。十二聖位者。謂乾、信、住、行、向、煖、頂、忍、世、地、等、妙也。無漸位者。經云。從是漸修。隨所發行。安立聖位。故詳如楞嚴七八卷明。十二妄想者。謂六根六塵妄想也。經云。六亂妄想。成業性故。十二區分。由此輪轉。是故世間聲香味觸窮十二變。爲一旋復。十二佛德者。謂六根六塵功德也。經云。總

括始終。六根之中。各各功德。有千二百。詳如楞嚴四七卷明。然下通妨。難云。據大本意。十二佛名。乃無量壽佛別號。唯一佛身。此何說言。有十二佛相繼出耶。故此通云。諸佛同名甚多。故十二佛。乃是往古。非今法藏所成佛也。若爾。何以今名。濫古號耶。故又釋云。詳彌陀勢至。同時發心。所師之佛。亦同無異。而今彌陀。十二別號。同古佛者。表顯師資。即心即佛之道。一也。猶今釋迦立號。倣同古釋迦佛。今觀音名。倣同古觀音等。故大本彌陀經云。過無量佛刹。同名釋迦者。不可勝數。則無量壽佛之名。百千萬億。不可窮盡。何止於一佛耶。

(已) 次別示教道

二分

初標名

二釋義

(庚) 初標名

彼佛教我念佛三昧。

隨彼佛十二佛也。語言指示謂之教。言念佛者。若據事念。一心憶想之謂念。三身接引之謂佛。則能念屬己。所念屬佛。若據理念。念即始覺。佛即本覺。以始合本。名爲念佛。念佛有四。一稱名。謂聞說佛名。一心稱念。二觀像。謂設立尊像。注目觀瞻。三觀想。謂以我心眼。想彼如來。四實相。即念自性。真實相。佛初二事。法界觀。心即佛故。後一理法界觀。佛即心故。第三事理無礙法界觀。是佛是心故。又清涼云。約能念心。不出五種。一緣想境界念佛門。二攝境唯心念佛門。三心境無礙念

佛門。四心境俱泯念佛門。五重重無盡念佛門。會曰。一、即前之初二、小乘教也。二、即前四、始也。三、即前三、終也。四、五、前所無者、頓圓教也。今此文中、約佛教邊、四五俱通。約機稟邊、唯局持名。然此持名、亦通圓頓。不唯局小。亦開五門。一、持念佛名門。心外有佛名故。小教、事法界觀也。二、攝名歸心門。佛名唯心現故。始教、理法界觀也。三、心名雙融門。即心即佛故。終教。四、心名俱絕門。非心非佛故。頓教、理事無礙法界觀也。五、圓通無盡門。一念心、一佛名、遍合法界、無有盡故。圓教、事事無礙法界觀也。梵語三昧、此云正定、亦云正思。正心行處。一心念佛、名正定心。若他念者、即名邪思惟也。三昧、是禪觀通。

名念佛、是一行別目。又此念佛三昧、亦名一行三昧、亦名諸佛現前三昧、般若三昧、普等三昧。

【釋】言念佛下釋念佛二字。念佛有下、明念佛法門。稱名者、文殊般若經云。衆生愚鈍、觀不能解。但令念聲相續、自得往生。彌陀經云。聞說阿彌陀佛、執持名號、觀像、通二。一觀現在相好光明之佛、如法華云。起立合掌、一心觀佛。二觀綵畫雕塑鑄造之佛、如優填王、以栴檀作佛像是也。觀想者、十六觀經云。諸佛如來、是法界身、入一切衆生心想中。是故心想佛時、是心即是三十二相、八十隨形好。實相者、觀佛三昧經云。佛告阿難。住念佛者、心印不壞。釋曰。諦了自心、名爲念佛。如如

不動、名爲不壞。解脫長者所謂、我欲見極樂世界阿彌陀佛、隨意即見、是也。初二下、約觀料揀也。若依六根、稱名、攝耳舌。觀像、攝眼身。觀想、攝鼻意。實相、攝六根。則一念佛三昧、六根無不攝也。又清涼下、引古明五也。緣境者、稱名觀像、皆屬外境故。唯心者、依正相好、唯是心作故。無礙者、雙照事理故。俱泯者、離相如空故。無盡者、於一切時處境念中、普見十身諸如來故。會曰下、會通古今也。又大疏云、古人已有五門。一稱名往生念佛門。二觀像滅罪念佛門。三攝境唯心念佛門。四心境無礙念佛門。五緣起圓通念佛門。此之五門、名則盡善、釋義不周、故今改之。若欲曲會、一二、即清涼緣境、無礙、兼攝

俱泯圓通。即無盡門。小教等者。前之四門。約觀。此之五門。約教。互相影顯。思之可知。今此文下。約四五念佛門。判今經也。佛教十二如來也。通四五者。以譬如下文中。但云憶佛念佛。不別指一門故。機稟勢至等也。局持名者。以佛問下文中。方云淨念相繼的。指出持名故問。何以勢至不通指耶。答。雖念佛三昧。古稱徑路。而持名一法。徑而又徑。何者。觀像則像去。還無。因成間斷。觀想則心麤。境細。妙觀難成。實相則衆生障重。解悟者希。至於無盡。則境界深廣。從何領荷。唯此持名。最爲簡捷。但能繼念。便得往生。如驥驟餘門念佛也。雖超群馬餘門修行也。未及龍飛持名念佛也。鶴沖餘門念佛也。已過凡禽餘門修行也。爭如鵬舉持名念佛也。故龍

樹毘婆沙論云。佛法有無量門。如世間道。有難有易。譬如跋人。陸道步行則苦。一日不過數里。水路乘船則樂。須臾便過千里。易行疾至。應當念佛。稱其名號。本願如是。問。佛有無量功德。一名難可攝盡。況實相中。離名字相。云何專稱名耶。答。極樂依正。言佛便周。佛功德海。舉名即盡。經云。治世語言。皆與實相不相違背。豈有萬德洪名。不即是實相耶。然此下。重顯持名一門。攝盡大小乘教。無論利根鈍根。均可依之而修也。正定者。揀念佛外。皆邪定故。正思者。於所念境。正直思察。故正。揀尋伺思。揀昏沈。正心行處者。謂定心正。所緣境。異於無明邪所受故。或云調直定。由衆生屈曲散亂。佛以諸三昧。

門、令直其屈曲、正其散亂故。禪觀通名者、如智論云、一切禪定攝心、皆名三昧、是也。一行別目者、有二釋。一謂萬行中一行。如諸經中、或以真如海印德藏爲三昧。或以如幻語言法界爲三昧。或有緣有相、無得無諍等。二即指念佛三昧。文殊般若經云、佛告文殊、欲入一行三昧者、應處空閒、捨諸亂意。不取相貌、繫心一佛、專稱名字、隨彼方所、端身正向、能於一佛、念念相續、即是念中、能見過去未來現在諸佛、念一佛功德、與念無量佛功德無二。若得一行三昧者、諸經法門、皆悉了知。問此教念佛、爲念十方佛耶。爲念阿彌陀耶。答但念阿彌陀佛。以十二如來同名阿彌陀故。下云、攝念佛人、歸於淨

土。又普廣問佛十方俱有佛土，何以獨讚西方。佛言：閻浮提人，心多雜亂，令其專心一境，乃得往生。若念十方諸佛，境繁意散，不成三昧。況諸佛同一法身，念一佛，即念一切佛。故問：何十二佛，皆教勢至，念自名耶。答：一者十二如來，本願如是。如今法藏願云：聞我名號，乃至十念，若不生者，不取正覺。是也。二者教念十二佛名，即是教念古彌陀十二別號。猶今法藏教念無量壽佛，即是教念無量光，乃至超日月光也。又此下出異名，約義配教。念佛，小也。般若，始也。佛現，終也。一行，頓也。普等，圓也。如理思之。

楞嚴經勢至念佛圓通章疏鈔卷上

音釋

天竺此云月氏沙門華言勤息般刺密帝唐翻極量譯音易翻梵語成華言也波羅夷此云棄犯此罪者永棄佛法邊外也阿鼻

翻無間大地獄名釋迦牟尼釋迦翻能仁姓也牟尼翻寂默名也他音拖伽音茄毘音皮迦音加膩尼去聲枳音只阿彌

陀此云無量壽亦云無量光須彌唐言妙高山王也菩提華言覺道菩薩摩訶薩菩薩此云覺有情摩訶薩此云大心眾生也摩訶般

若波羅蜜摩訶翻大般若翻智慧波羅蜜翻到彼岸趁音疾自後及之也迅音信疾也萎音透花草憔悴也娑婆此云堪忍堪能忍斯惡故懊音懊悔恨也

抵音底至也覓音密追尋也幹音紺辦作也躡音業蹈也阿伽陀此云普去能去眾病陀羅尼此云總持亦云遮持即咒也畊音庚犁田也

耨音漏耘草也修羅舊翻無端正新翻非天文殊此云妙德螟蛉音冥零桑蟲也括音郭包括也楫音接棹也艇音挺小船盛二百斛以上

舠音刀盛三百斛次小船也港音講水之分派道路艨艟音蒙檣形狹而長曰艨艟上下四方有板曰艦中船也亦戰船名涅槃此云滅度亦云圓寂鱗鱗

音禮耀江中大船也艤音郎鄒海中大船也特方維造以舟為橋者曰造天子舟也連四船者曰維諸侯舟也兩船並者曰方大夫舟也單一船者曰特士人舟也辟支

此云緣覺亦云獨覺紆音迂曲也富樓那華言滿願廕音蔭庇麻也覃音潭及也又延也菴羅翻難分別其果似桃非桃似柰非柰花多子少葉似柳味如梨王城種之果可療疾

阿含

翻教又云無
比法經名也

嬈

音撓撓
動也

牒

音蝶文乃蹀前而起者曰
牒又移前文於此曰牒

儲

音除副也貳也太
子副君謂之儲君

涌

音永泛
溢也

殫

音
擊

祇園

祇陀太
子園也

俱舍

翻藏包含攝
持之義也

倣

音訪
倣也

泯

音民
絕也

雕

音彫
木雕

塑

音素
泥塑

優填

唐言出受
王名也

梅檀

義翻與藥
能除病故

驥

音記千里
良馬也

驟

音繡馬之
疾速行也

冲

音充與辨同不飛
則已飛則冲天也

鵬

音朋大鵬鳥也翼如垂天
之雲一舉而上九萬里遠

毘婆沙

此云廣
解論名

跛

音波上聲足偏
廢行不正也

尋伺

粗覺名尋求
細觀名伺察

閻浮提

華言樹南洲中有
此樹故樹名勝金

蛙

音蛙形似
蝦蟆水蟲

大勢至菩薩念佛圓通章疏鈔

楞嚴經勢至念佛圓通章疏鈔卷下

清浙水慈雲灌頂沙門續法集

(庚) 二釋義二分 先修因 後證果

(辛) 先修因二分 初舉喻 二合法

(壬) 初舉喻二分 初二人喻 二母子喻

(癸) 初二人喻

譬如有人。一專爲憶。一人專忘。如是二人。若逢不逢。或見非見。二人相憶。二憶念深。如是乃至。從生至生。同於形影。不相乖異。隨先喻單憶有離也。有人喻生佛二人也。一專憶者。喻佛念衆生也。一專忘者。喻衆生不念佛也。若逢不逢。或見非見者。

以佛專念衆生、未嘗不在衆生前、今偶逢偶見、故言若逢或見也。衆生專不念佛、佛雖在衆生前、亦蹉過不見、故言若不逢見也。二人下、後喻雙憶不離也。二相憶者、喻生佛念同也。二念深者、喻久憶不忘也。如是、結指之詞。乃至、超略之詞。謂能如是念、則決定時時常相見也。從生至生、不相異者、喻生生不相離也。同形影者、謂生佛世世不捨、猶如形影無乖違也。

鈔佛專憶者、含二種意。一者佛有大悲願故。二者佛在因地、自果未圓、尚於衆生念念不捨。何況果後、更無餘事。則念衆生、慇懃懇切、無有加故。衆生專忘、亦有二意。一者衆生無有

信行願故。二者生在迷位、纏惑業苦。人天因果、尚不得修。何況佛果、豈易得者、則念佛心、沈埋隱沒、不能發故。偶逢見者、諸佛菩薩、不違本願、遊化娑婆。故令衆生、偶然逢見也。亦蹉過者、如見文殊、但覩老人、貧婆等類。或見本相、亦不蒙法利。此由惑業障覆、妄見劣相。如薄福見寶、爲蛇爲蛙。豈彼聖賢、作意詐隱其本相耶。生佛念同者、謂衆生念佛、猶如佛念衆生相同也。久憶不忘者、謂時刻在懷、雖經年累月、乃至盡形、亦不忘也。結指者、指上相憶念深也。超略者、謂不但此生、常得見佛。乃至他生、盡未來際、亦常得見佛也。乖違也。異離也。形影、略舉一事、以例不離。至於聲響、水波、鏡光、皆不相捨離。

也。又此形影。近對下喻。合文意。單顯獲見佛益。遠對下證果文意。雙顯獲見佛成佛二益。現當見佛。一益也。心開染香。二益也。應釋文云。如是一心念佛。心同佛也。心同形亦同。形同影亦同。不唯此世。乃至生生世世。形影皆同也。楞嚴云。容貌如佛。心相亦同。身心合成。名法王子。此非敵對正意。故疏不釋。

（癸）二母子喻

十方如來。憐念衆生。如母憶子。若子逃逝。雖憶何爲。子若憶母。如母憶時。母子歷生。不相違遠。

疏上二人喻。泛指親友。猶覺寬緩。故此重將母子最親切者爲喻。使人起信行也。於中亦有二。先喻單憶有離。首三句。即

上一人專憶。次二句。即上一人專忘。如來母也。衆生子也。世間慈念最切者。莫如母親。子若悖逆。忘恩負義。母念或衰。心生悔恨。佛念衆生。更過於母。逆惡重者。佛念愈深。乃至入於阿鼻地獄。代此衆生。受無量苦。又母念子。慈止一世。佛念衆生。慈心無盡。世世相隨。無有退轉。故云佛念衆生。如母憶子也。若子逃逝者。喻衆生不念佛。而墮惡道苦也。雖憶何爲者。喻如來單憶無益也。子若下。後喻雙憶不離。初二句。即上相憶念深。末二句。即上生生不異。謂六道衆生。慕念如來。猶如如來。憐念衆生者。然方得感應道交。生佛不二也。故高齊大行和尚云。宗崇念佛四字教。詔謂信憶二字。不離於心。稱敬

二字不離於口。任意早晚。終無再住娑婆之法。此爲念佛第一要策。

鈔泛指者。師資君臣。皆該在許。如來下問。前言念佛。但念彌陀。不念諸佛。云何此言十方如來耶。答有二意。一即指彌陀一佛。以三世十方。有無量彌陀故。觀經云。從下方金光佛刹。乃至上方光明王佛刹。於其中間。無量塵數分身無量壽佛。二通指十方諸佛。謂不唯我彌陀一佛。悲願如是。即十方諸佛。憐念亦然。正顯佛佛道同故。華嚴問明品云。十方諸如來。同共一法身。一心一智慧。力無畏亦然。楞伽第四云。一切諸佛。有四平等。所謂字平等。語平等。身平等。法平等。觀經云。見

無量壽佛者。即見十方無量諸佛。憐念者。三昧經云。諸佛心者。大慈悲是。慈悲所緣。緣苦衆生。若見衆生。受苦惱時。如箭入心。欲拔其苦。是以求往生者。不可思惟己惡。而疑佛不來接。誰知佛心。專於逆苦衆生之中。種種救度。如何自生疑阻。甘心苦趣耶。問。逃逝二句。與上專忘。逢不逢義。有差別否。答。亦同亦異。同者。不念佛。則不能見佛。雖見佛。亦不蒙法利。此與逃逝無異。憶他何爲。異者。謂前之喻意。尚明衆生。或有時而念。但念之不切。憶之不深。故若逢不逢。於佛憶猶爲有益。此中喻意。竟明衆生。不唯忘念。而且謗佛。以不信故。墮在三途。受無量苦。故若逃逝。於佛憶則爲無益。感應生佛者。子喻。

生感。母喻佛應也。道交不二，合不違也。故高齊下，彼論云：往生淨土，要須有信。信千即千生，信萬即萬生。信佛名字，不離心口，諸佛即救，諸佛即護，心常憶佛，口常稱名，身常尊敬，始名深信。

(壬) 二合法

若衆生心憶佛念佛，現前當來，必定見佛。

隨衆生心者，揀口念而心不念也。憶，記持不忘也。念，繫緣在懷也。又初時偶然勉強記憶，曰憶。後時長久熟脫緣念，曰念。又憶是暫念，一憶之謂。念是數憶，常念之謂。若事憶念，則專心注意，毫無雜緣。若理憶念，則唯妙覺明圓照法界，佛亦有

二。一事相。即是三身十身。二理性。唯是一真法界。又事理憶念佛中。復各有二。一行布。二圓融。謂先念化報。然後法等。是事次第也。若三若十。同在一心。是事一時也。先空。次不空。後空不空。是理次第也。三如來藏心佛。同在一時中念。是理圓融也。問。若心外有佛。何容理念。設心外無佛。烏用事爲。答。心外有佛者。由我心佛。成彼外佛。經云。諸佛正知。從心想生。故須理念。心外無佛者。託心外佛。顯我心佛。經云。心想佛時。是心作佛。故須事念。若離事理二念。何名即心即佛。問。若即佛是心。祇應念心。何必念佛。又即心是佛。祇應念佛。何必念心。答。但執即佛是心。不知即我本覺心性。是彼究竟覺佛。經云。

是心即佛三十二相。故不妨念佛。又執即心是佛，不知即彼究竟覺佛，是我本覺心性。經云：諸佛入於衆生心中，故不妨念心。若心佛偏念，即義不成矣。問：一真法界體無二相，何存內外心佛念耶？答：法界一真，本無內外，不屬佛心。佛自證窮，知生等有欲，令生悟義，分心佛。佛爲外境，心爲內境。憶念功成，自然證知，心無佛外之心，佛無心外之佛。唯一法界，普融無盡。現前見佛者，謂不離現陰，於定中見，或於夢中見也。當來見佛者，謂報終陰壞，見佛來迎，或於華中見也。而云必定者，有二意。一感應道交，難思議故，謂信得即心是佛，專於事念，念相好佛，故見果報佛來入我心中。經云：是心作佛，諸佛

如來來入一切衆生想中。二始本契合法爾然故。謂信得即佛是心、專於理念、念本性佛。故於自心中見法身佛現。經云。是心是佛、心想佛時、是心即是三十二相。此中不合佛念衆生者、重在衆生念佛故。

鈔憶下、唯識云。云何爲念。於曾習境、令心明記不忘爲性。定依爲業。謂數憶持曾所受境、令不忘失。能引定故。於曾未受體類境中、全不起念。設曾所受、不能明記、念亦不生。慈雲懺主云。凡涉歷緣務而內心不忘於佛、謂之憶念。譬如世人切事繫心、雖經歷語言、去來坐臥、種種作務、而不妨密憶前事。宛然念佛之心、亦應如是。若或失念、數數攝還。久久成性、任

運常憶。又復覺心微起惡念，即便憶佛。以佛力故，惡念自息。若見他人受苦，以念佛心，憐愍於彼，願其離苦。如是相續念佛繫心，能辦一切淨土功德。若事下，謂此中專心意念，及下攝根淨念，即彌陀經一心不亂，一向專念，觀經一心繫念也。皆通事理。事則能所緣歷，心佛分明。唯此一念，更無餘念。念念相續，成就定力。起信謂以專意念佛因緣，是也。理則能所一如，心佛不二。唯此一緣，更無餘緣。緣心自在，成就慧力。起信所謂，雖念亦無能念可念，是也。又普門疏云：若用心存念，無有間斷，名事一心。若了此念心，四性不生，名理一心。對前四種五種念佛，一一具此事理。二念問前四五門，與此事理。

俱約能念爲義、有異否。答前之四五、乃標法門方便有多。此之事理、是約行人用心各別。是故四五門中、必具二心。二心之中、必攝四五。無混濫也。問此中事理、與前四五念佛判事。理觀何別。答前則別判、四五門各屬事理。此則通判、四五一并有事理。較之前略今細、故不同也。然此二念中、雖不可缺一。亦有上智專於理念、或有鈍根專於事念、或有中人兼於理事。皆隨機宜、不必疑阻。以得見佛、利益同故。佛亦下問三。中法身、十中智空身等、何亦稱爲事耶。答墮數量三十數也故。屬佛身身相事也故。問起信云、若人專念阿彌陀佛、所修善根、即得見佛。豈非事念。又云、若觀彼佛、眞如法身、常勤修習、畢竟

得生。豈非理念。今何以法不屬理耶。答。論對報化。故屬理念。今對一真。故又屬事。所以文殊般若。明一行念佛三昧。先明不動法界。繫緣法界等。大疏亦云。一法界行。亦無一故。問。十身佛。獨出華嚴。餘所無者。云何。今教念耶。答。諸佛說教雖別。三十身同故。觀經云。諸佛如來。是法界身。如德雲。但念十身佛也。清涼疏鈔亦云。然其念佛三昧。總相則一。別即三身。十身。修觀各別。三身者。謂念法報化佛。於三身中。各有依正。便成六觀。謂念法性身土。爲法身依正。念報身。華藏等刹。爲依。十身相海等。爲正。念餘淨土水鳥樹林。爲化身依。三十二相等。爲化身正。十身者。爲念願智。法力持。意生化。威勢。及菩提。

福德相好莊嚴身。如是重重成帝網境。則入普賢念佛之門。詳在六十二卷。行布漸次也。圓融一念也。利根則圓融。下愚則漸次。中根則不定。又或利根先理後事。鈍根先事後理。皆隨機便。無一定相。先空等者。且約當部四卷。三如來藏心明。若對所念理中。法界應云先無爲理法界佛。次有爲事法界佛。後理事無障礙法界佛。以法界如來藏同一心故。左右言也。問下通妨。初釋二種念中。隨用一種。不須兼具難。次釋心佛即中。隨念一即。不必並驅難。三釋即心即佛。成心佛兩存難。定中見者。華嚴四十六云。若有衆生。專心憶念。則佛現其前等。六十二云。住自在心念佛門。隨自心樂。現其像故。住一

切境念佛門、普於諸境、見佛現故。楞伽云。諸佛有二加持。謂令入三昧、也一現身灌頂、也二諸菩薩等爲二持故。即能親見一切諸佛。觀經云。無量壽佛、相好光明、徧十方界。念佛衆生、攝取不捨。故禪觀中、皆得見也。夢中見者、法華云。若於夢中、見諸如來、坐師子座、圍繞說法。彌陀下輩文云。此人臨終、夢見彼佛、亦得往生。報終見佛者、稱揚諸佛功德經云。若用得聞彌陀名者、一心信樂。其人命終、阿彌陀佛、住其人前。鼓音王經云。若有受持彼佛名號。臨命終時、阿彌陀佛、即與大衆、住其人前、令其得見。華中見者、觀經下品中生文云。吹諸天華、華上皆有化佛菩薩、迎接此人。如一念頃、生蓮華內。經於六

劫蓮華乃敷。觀音勢至爲說經典。問。今有專心念佛。於定夢中。亦不見佛。又有一生念佛。及臨終時。亦不生方。何也。答。專心念佛。定夢不見者。由其過去業障重故。現在善力弱故。又佛有二加被。一者無障則顯加。令其親見。二者障重則冥加。暗令得益。故普賢云。有諸衆生。心中發明。普賢行者。我時分身。皆至其處。縱彼障深。未得見我。我與其人。暗中摩頂。擁護令就。一生念佛。不生方者。念佛不精誠故。生疑不篤信故。無有往生願故。不能斷貪愛故。問。現在善根淺薄。可以增修。過去業障深重。云何得知。而爲對治。答。有二揀別。一者三昧中。若有善根發相。則知過去種植善因。何爲善發。略開四種。一

念化佛、善根發相者。於念佛三昧中、忽然憶佛、修六度萬行、成三十二相、身有好光、心有智慧、說法利生、降伏魔怨。作是念時、生敬愛心、開發三昧、增進佛行。或於定中、見佛身相、心淨信解。或於夢中、聞佛說法、覺悟佛心。二念報佛、善根發相者。於念佛時、忽然憶佛圓滿果報之身、皆是無漏功德成就。相好光明、一一無量。神通智慧、充滿法界。相續湛然、盡未來際。作是念時、慧解分明、定必安隱、善念相續。或於定中、聞說不思議佛法境界、即便出生無量智慧法門。或於夢中、見八萬四千諸妙相好、即便出生無量願行功德。三念法佛、善根發相者。於三昧時、忽然憶佛真實性身、清淨無相、猶如虛空。

唯是第一義諦。無有世諦境界。離生離滅。無作無爲。非來非去。不減不增。作是念時。善心開發。入定安樂。通達無量法門。現起無邊佛境。或於定中。見佛以微妙法身。具諸相好。即便覺悟。遠離常無常。而現常無常。唯識云。法身五法爲性。非淨法界。獨名法身。如是悟時。開發實智。三時現前。或於夢中。見佛以諸法如義。而爲其身。即便覺悟。以真如爲佛。無境不是佛。大品云。諸法如實相。諸法如實。即是佛。離是之外。更無別佛。如是悟時。清淨六根。法性現前。四念十佛。善根發相者。於禪觀中。忽然憶佛。法界身雲。依正圓融。真應無礙。一多即入。大小隱顯。亦理亦事。亦人亦法。亦此亦彼。亦因亦果。亦九界。

亦佛界。亦三身。亦十身。作是念時。開發無盡善心。出生無盡三昧。滅重重煩惱。顯重重法性。或於定中。見無障礙佛。剎剎塵塵。現身說法。即便證知德雲。一念佛門。出生二十一門。如是知後。發普賢願。行普賢行。或於夢中。見無盡身佛。說法利生。即便悟入威光念佛三昧。統攝無盡三昧。如是悟後。發遮那智。成遮那境。以上善根。皆由過去今生。念佛習報相也。見諸

相好。悉屬報因相現。發諸善心。皆是習因善發。

根。何爲障發。亦開四種。一者昏沈暗蔽業障發相。謂念佛時。即便昏睡。沈暗瞪矐。無所記別。令諸禪觀。不得開發。二者妄念散亂業障發相。欲修觀時。雖不昏沈。而生邪想。欲作四重

五逆十惡毀戒等事。展轉生續、無時暫停。因是三昧、不得現前。三者惡境逼迫業障發相。將人定時、雖無妄念、而有惡境。或見焚溺。或聞震擊。或無頭手。或墮山海。如是逼迫、令其驚怖。所發道心、障礙不起。四者病事苦惱業障發相。當念佛時、雖無上境、而身忽然生諸疾病、苦惱百端。或爲世間種種事務、牽連不斷。因是無生、不能證入。以上業障、皆由過去不善報因相也。因此善惡二法發相、即驗自己根性、是善是惡。亦知自己在前生時、種善不種善、作惡不作惡。如是見已、善者增修、令其圓滿。惡者對治、令其除滅。云何治滅、亦開四門。一治滅昏沈障。應教念化佛三十二相中、隨取一相。或取白毫。

相閉目而觀。若心暗鈍、懸想不成。當對一尊端嚴佛相、緣之入觀。若不明了、即開眼觀、復更閉目。如是想時、心眼開豁、即破此障、無復沈睡。二治滅妄念障。應教念報佛所有十力、四無所畏、十八不共、三昧解脫、一切種智、不可思議無量功德。普現色身、利益一切。神通變化、摧伏魔外。如是念佛善法功德、一切邪惡、心心數法自然銷滅。三治滅惡境界障。應教念佛法佛者、即是平等法性。空寂無爲、無有形相。既無形相、焉有境界逼迫。境界空故、即是治滅此障。四治滅病事障。應教念十佛緣佛菩提威勢力持本願功德、不爲世間事務牽纏。緣佛福德相好莊嚴意生身相、不爲一切病苦所惱。念佛法

身猶如虛空。隨其智力。應化一切。非如衆生。煩惱陰身。八苦交煎。世事纏縛。如蠶作繭。無出頭日。如是念時。此障即滅。故知存心念佛。廣大功德。無有不成。深重業障。無有不滅也。問。念佛佛現。亦有魔否。念佛所發善根。亦有魔作否耶。答。佛有神通力。威德力。本願力。大光明中。必無魔事。或有宿障深厚。及不善用心。容有魔起。須當辨識。經論開二。一所現相好。不與經合者。是爲魔事。二不與本所修行合者。是爲魔事。至於善根發相。是魔作。非魔作。亦有二辨。一約心境久速。謂此見佛聞法等事。若是善根發者。則報因境相。暫現便謝。習因善心相續不斷。若是魔所作者。則報因境相。久久不滅。或謝去。

更來擾亂。習因善心暫發還滅。或倏爾變成惡念。二約煩惱輕重。謂見善相發時。能令心識動亂。煩惱增重。衆多妨礙。不利定心。悉屬魔作。若見善相現已。雖未證禪定。而身心明淨。善念開發。煩惱輕微。或三昧開通。身心快樂。內外安隱。氣色光潤。煩惱寂寂。功德巍巍。此爲善發相也。若邪正未了。應用二法以對治之。一者止法。謂深入三昧。一心念佛。於所現相。悉知虛誑。但平心住定。不取不捨。如是息心。寂然不起分別時。若是聖境。則定力逾深。善相如法。若是魔境。現相不久自壞。縱發亦不如法。二者觀法。謂觀真空法界。念虛空法佛。推檢現相。不見生處。相空寂故。心念亦寂。知魔界如。即佛界。

如離眞如外、無一法相。如是觀念佛法自當現前。魔境自然消滅。然念佛遇魔、亦萬中一也。良由修淨業人、具三種力。一者念力、二者本有佛性力、三者佛攝取力。云何邪魔得便擾害。故稱揚諸佛功德經云。若有得聞彌陀名者、阿彌陀佛、住其人前。魔不能壞彼正覺心。是故但當一心念佛、莫疑慮也。而云必定下釋疑難也。妨曰。如來者、無所從來、亦無所去。云何有佛現在前耶。故此通云。有二意故。佛必定見。一約他佛、謂法身眞佛、本無生滅。從眞起應、不妨來去。是故心淨佛現、心垢佛滅。其猶水澄月來、水濁月亡也。二約自佛、謂本覺心佛、本無來去。依覺不覺、不妨出沒。是故心迷佛隱、心悟佛顯。

其猶鏡塵光暗、鏡潔光明也。此中下、亦釋疑也。妨曰。上二喻中、俱含如來念衆生意。云何合內、無佛念耶。故此通云。衆生無有信願、故此再三勸勉。佛念衆生、乃佛自願、何待言也。

(辛) 後證果

二分

初法說

二喻明

(壬) 初法說

去佛不遠。不假方便、自得心開。

隨初一句、躡前修因說也。次二句、正明證果相也。不遠者、現前見中、事念見他佛。則先色身相佛、後法身真佛。理念見自佛。則先分證覺佛、後究竟覺佛。當來見中、事念見他佛。則先化身佛、後報身佛。理念見自佛。則先本覺佛、後妙覺佛。故云、

去佛不遠。不假方便者。約事。則念佛法門。即勝異方便。何假餘方便門。以助顯我本性也。約理。則念佛即是念心。心佛無差。自他不二。豈離唯心自佛。而假心外他佛作方便耶。自得心開者。以念佛心。入佛知見。圓滿菩提。歸無所得。約事。則佛果成證。約理。則覺體圓顯。所謂但得見彌陀。何愁不開悟是也。

鈔初一句下。略提不遠下。詳釋現前等者。難曰。上既見佛。今何又云去不遠耶。故此釋云。上之見佛。乃是色分化本。此之去佛。即是法究報妙。故不相違。亦可由見佛故。衆生與佛同在一處。猶如形影。不相違遠也。

(壬) 二喻明

如染香人、身有香氣。此則名曰香光莊嚴。

疏初二句、舉喻。法上、身近佛身、心開佛心。合喻中、人沾染香、身亦有香。次二句、出名。謂以如來法身香光、莊嚴自心本覺如來。如華嚴以旃檀沈水香等、喻菩提心香。今亦以人天名香、喻如來法身功德香也。

法上下、若直約法言。謂念佛名香、近佛身香、開佛心香。香長者所云、發心念佛香、是也。喻中下、起信云。如世間衣服、實無於香。若人以香而熏習故、則有香氣。無明染法、實無淨業。但以真如而熏習故、則有淨用。無明染者、本覺心佛、藏在

無明殼也。彼論明在纏如來藏心，今經喻出纏如來藏心，故云心開。謂心開成佛，以近佛故。如身淨成香，以塗香故。若依相宗立量，應云念佛是有法，佛心開。宗因云去佛不遠故。同喻如染香人，香人是有法，身有香光莊嚴。宗因云染香故。同喻如念佛，出名者，出三昧名，亦法門名也。如華嚴下七十八云，如白旃檀，若以塗身，能除熱惱，令得清涼。菩提心香，能除貪恚癡等熱惱，令其具足智慧清涼。又如天上黑旃檀香，若燒一銖，普熏千界。菩提心香，一念功德，普熏法界。又轉輪王有沈香寶，名曰象藏。若燒此香，王四種兵，悉騰虛空。菩提心香，若一發時，即令一切善根，永出三界。又如波利質多羅樹，

其皮香氣、一切華香、皆不能及。菩提心樹、所發大願功德之香。一切二乘五分法香、悉不能及。又波利華、一日熏衣。薝蔔等華、雖千歲熏、亦不能及。菩提心華、一生所熏諸功德香。一切二乘無漏功德、百千劫熏、亦不能及。人天香者、華嚴云。人間有香、名曰象藏。因龍鬥生。若燒一丸、雨七日香。若遇著者、皆成金色。衆生齏者、七日快樂、無有諸病。摩羅耶山、出旃檀香、名曰牛頭。若塗身者、火不能燒。海中有香、名無能勝。若塗螺鼓、其聲發時、敵軍皆退。阿那婆達多池側邊、出沈水香、名蓮華藏。若燒一丸、普熏閻浮、聞者離罪、戒品清淨。雪山有香、名阿盧那。若有齏者、離諸垢染。羅刹界中、香名海藏。輪王燒

時王及四軍皆騰虛空。善法天中有香，名淨莊嚴。若燒一丸，而以熏之。普使諸天，心念於佛。須夜摩天，香名淨藏。若燒熏之夜，摩天衆集天王所，而共聽法。兜率天中有香，名先陀婆。若燒一丸，普雨一切供具，供養諸佛菩薩。普變化天，香名奪意。若燒一丸，於七日中，普雨一切諸莊嚴具。清涼疏鈔云：初喻發菩提心香。次即忍香，瞋火不燒。三即進香，魔軍退散。次五如次，是五分法身香，四戒香，可知。五定香，得離垢三昧。六慧香，王及四兵皆騰空者，慧證空故。七解脫香，心念於佛，脫五欲故。八知見香，雲集聽法，是知見故。九即稱法界香。先陀婆，一名四寶。此宜用鹽香，似此故。十忘能所香，故名奪意。今

之佛法身香、具衆功德、亦猶是也。

(戊) 二略述自己修行

二分

初自利、二利他

(己) 初自利

我本因地、以念佛心、入無生忍。

隨本因、因也。無生、果也。次句、徹果該因。心者、述己念佛、非用分別意識而念。乃六根都攝、一心不亂念也。入、證也。忍、智也。無生、約理性言。慧心安此無生理故、名無生忍。清涼疏云。若約忍無生理、即無生之忍。若約無生之智、及煩惱不生、則無生、即忍。無生法性、始終無殊。證入法忍、地位不等。楞嚴第三漸云。是人即獲無生法忍。信力入印度經云。無生忍法、則能

清淨初觀喜地、得大無畏安隱之處。謂菩薩生如是心、我已
得住無生忍故。生安隱心、爲令他住無生忍故、起安慰心。仁
王經云、無生忍菩薩、所謂遠不動觀慧、遠即七遠行地、不動、
即第八地觀慧、即九善慧地也。則知此忍、始於三漸、終於等
覺說。以勢至位居補處故。上句、能修證。此句、所悟證。謂以真
正淨念、除滅邪妄濁想、內想不起、外境自寂。內外法空、一切
無生。仁王云、一切法空、得無生忍。又無生忍、亦得名無滅忍、
無住忍。華嚴云、無生忍者、不見有少法生、亦不見少法滅。何
以故。若無生、則無滅。若無生滅、則無住處。今念化身佛、證得
空如來藏智、名入無生法忍。念報身佛、證得不空如來藏智、

名入無滅法忍。念法身佛，證得空不空如來藏智，名入無住法忍。此亦舉一以攝餘耳。若唯忍無生，小聖亦有。豈足爲等覺深玄忍耶。

鈔六根都攝者，返流旋一，六用不行也。一心不亂者，依一藏心，餘念不生也。念者，心爲能念，佛爲所念，念通能所，忍，智也。不消文。清涼疏下鈔云：無生忍有二義。一理智雙明，二唯就智說。復二。一智不生，即無分別智，體無念慮故。二煩惱不生，妄想不起故。無生法下判位。上句下，出得忍所以。又無生下，約別相義釋。若無生等者，具云：若無生，則無滅。若無滅，則無盡。若無盡，則離垢。若離垢，則無差別。若無差別，則無處所。若

無處所、則寂靜。若寂靜、則離欲。若離欲、則無作。若無作、則無願。若無願、則無住。若無住、則無去。無來。無生。無來。離欲、無作、無願、空也。無滅、無盡、無去、不空也。離垢、無別、無處、寂靜、無住、空不空也。今念下、配釋可知。此亦下、通妨也。難曰、既有無滅、忍等、云何獨無生耶。釋曰、此有二意。一者舉總攝別、稱爲無生。二者以初攝後、但標無生理、實具諸忍也。若唯下、亦通妨也。難曰、唯約無生法理、不通無滅忍等、有何過耶。釋曰、等覺之忍、在無滅等、故非淺近。若唯無生、小乘亦證、何足深玄。

(己) 二利他

今於此界、攝念佛人、歸於淨土。

此界、娑婆苦世界也。淨土、安養樂國土也。攝者、持也、接也。生前以威力加持、令不退念。臨終以願力接引、令得往生。歸者、還也。此界爲旅亭、彼土是家鄉。猶如有人、因事遠遊、未得歸還。今遇親友、指示道路、速回家鄉也。能攝、屬勢至。所攝、屬行人。攝則雙通。能所歸義亦然。能歸、行人也。所歸、淨土也。歸兼能所。念佛法也。有五法門、見五土佛。謂憶想外境念佛、則生歸變化土、見變化身佛。攝境歸心念佛、則生劣受用土、見劣受用身佛。心境互融念佛、則歸勝受用土、見勝受用身佛。心境雙泯念佛、則生法性土、見法性身佛。圓通無盡念佛、則歸法界無障礙土、見法界無障礙身佛。人者、機也。具聞思修、

三妙慧故。備信願行。三資糧故。始名念佛人也。問。設行五逆十惡。亦具三資糧慧。得生彼土否耶。答。雖有諸過。於彼佛土。有信行願。亦名爲器。如三輩九品中。下輩下品是也。問。念幾時佛。得能見佛生方。答。隨機不定。或盡形持。或九十日。或七七。一七。或十日。一日。或十念。或一念。但能稱名。必得見佛。況有彌陀本願。勢至攝受。豈有念佛不生方耶。

○此界苦。淨土樂者。謂此土具八苦。生居胎獄。老厭龍鍾。病受痛癘。死悲分散。愛則欲合。偏離。冤則欲逃。偏遇。求則欲得。偏失。乃至五陰熾盛。而彼國蓮華化生。則無生苦。寒暑不遷。則無老苦。身離分段。則無病苦。壽命無量。則無死苦。無父母

妻子則無愛別離苦。上善人聚則無怨憎會苦。所欲自至則無求不得苦。觀照空寂則無五陰盛苦。慈雲懺主云。不值佛、不聞法、惡友纏、群魔惱、受輪迴、墮惡趣、塵緣障道、壽命短促、修行退失、塵劫難成、此即娑婆十種苦也。常見佛、常聞法、聖賢會、離魔事、輪迴息、無惡道、勝緣助道、壽命無量、入正定聚、一生行滿、此即安養十種樂也。歸義下、清涼貞元疏問。不生華藏而生極樂者何也。答有四意。一者有緣故。彌陀願重、偏接娑婆人也。二者使衆生歸憑情一故。若說十方皆妙、初心茫然、無所依託也。三者不離華藏故。極樂去此十萬億刹、即在華藏第十三層、未出刹種外也。四者即本師故。經云。或有

見佛無量壽、觀自在等所圍繞。既讚本尊遮那之德如是。豈非本師隨名異化也。事則從此界歸彼界。見彌陀、居極樂。理則返不覺、還本覺。見自性、居唯心。問既萬法唯心、何以見彼此土有苦樂。生佛有來去耶。答土有苦樂、即心相垢淨。生有來去、即心性迷悟。如是垢淨迷悟、總不離乎法界。故云心外無法。楞伽亦云。若一切皆心、世間無處住。何因見大地、衆生有去來。問難也。如鳥喻衆生遊虛空。喻自心隨分別而去。喻分別識。謂從自心空中。而後現衆生鳥。彼衆生鳥。還於自心中。隨分別識。去來遊履也。無依亦無住、如履地而行。謂自心空。雖無依止住處。而能令衆生鳥。如履平地。似有依住也。衆生亦如是。隨於妄分別、遊履於自心。如鳥在虛空。答釋也。前四句喻。後四句合。聞思修者、聞說佛名、爲聞慧。憶想在懷、爲思慧。持念不忘、爲

修慧。佛地論云。菩薩履三妙慧。淨土往還。釋云。以聞思修。得入淨土。故念佛人。必具三慧。信願行者。聞念佛門。心不疑貳。謂之信。信已而解。心起樂欲。謂之願。願已而念。心勤精進。謂之行。彌陀經云。若有信者。應當發願。執持名號。雖有諸過等者。觀經鈔云。此土博地凡夫。屬邪定聚。發心修行。未得不退者。屬不定聚。已得不退者。屬正定聚。若生安養。不論高下。所以者何。五逆罪人。臨終十念。得往生者。亦得不退。成正定聚。故準知罪人十念。即名器矣。反顯世人。雖行衆善。於彼佛土。無信行願。亦名爲非器也。三輩九品者。若發菩提心。深信因果。不謗三寶。大修功德。專念彌陀。願生彼國。眞佛來迎。坐七

寶蓮、住不退轉。智慧勇猛、神通自在。此名爲上輩也。兼利他行。若發菩提心、深信因果、不謗正法、少修功德、專念佛名、回向願生、化佛來迎、坐蓮華中、往生其國、住不退轉、功德智慧。此名爲中輩也。唯自利行。若發菩提心、亦信因果、不謗正法、不造五逆。雖無功德、專念佛名、十聲一聲。臨命終時、夢見彼佛、亦得往生、功德智慧。此名爲下輩也。缺二利行。若七日七夜、禮念佛名、三心至誠心、深心、回向發願心、六念佛法僧、天施戒、讀經解義、深信因果、持戒利生、發心發願、回向求生者。也。因真佛與化佛來迎、乘金剛臺、即得華開、見佛聞法、悟無生忍、受諸佛記。也。果此名爲上品上生也。若五日五夜、專意念佛、不謗三寶、善解義趣、深信因

果持戒弘法發大心願回向求生者。也。因真佛與化佛來迎乘
紫金臺經宿華開見佛聞法。七日後菩提不退一小劫得忍
受記。也。果此名爲上品中生也。若七日或五夜至心念佛不謗
三寶深信因果持戒利物發大道心回向求生者。也。因真佛與
化佛來接坐金蓮華一日一夜華開七日之中見佛於三七
後聞法經三小劫住歡喜地。也。果此名爲上品下生也。如是三
品即前上輩所開兼利他行若三日三夜禮念佛名持諸齋
戒發心發願回向求生者。也。因真佛來引乘蓮華臺往生彼土
蓮華即開聞四諦法得羅漢果。也。果此名爲中品上生也。若一
日一夜稱念彌陀八戒十戒發心發願回向求生者。也。因真佛

來引、坐七寶蓮。經七日開、得須陀洹。至半劫後、成羅漢果。也果
此名爲中品中生也。若一日一夜、專意念佛、孝養仁慈、臨終
遇善知識、指示淨土法門者。也因命終即坐蓮華生彼。經七日
已聞法、得須陀洹。過一小劫、成阿羅漢。也果此名爲中品下生
也。如是三品、即前中輩所開、唯自利行。若不謗正法、亦作衆
惡。命終時、聞經名、稱彌陀。至半日、或半夜者。也因化佛來引、坐
寶蓮華。經七七日、華開聞法、發菩提心。過十小劫、得入初地。
也果此名爲下品上生也。若破戒偷盜、然不謗三寶、臨終聞淨
土法、稱念佛名。經一時一刻者。也因化佛來引、坐蓮華上。過六
劫後、蓮華始開、聞法發心。也果此名爲下品中生也。若造五逆

十惡、然亦不謗正法。臨終聞佛、至心十念、乃至一念者。也。因命終見金蓮華、滿十二大劫、蓮華方開、聞實相法、發無上心。也。果此名爲下品下生也。如是三品、即前下輩所開、無二利行問。大本云、唯除五逆。觀經云、五逆得生、二義云何答。大本云、唯除五逆、誹謗正法。則知五逆而兼謗法者、乃在所除也。如不兼謗者、亦未必除。良由謗則不信、不信則不生。所謂疑則華不開、是也。觀經但言五逆、不言謗法。則知雖具五逆、不謗法者、必定得生。如兼謗者、亦不生也。良由信則不謗、不謗則華開。所謂信則決定生、是也。下輩下品者、謂下輩內之下品、非中上也。問。大本三輩、純明善行、不及惡人。止齊觀經前之六

品云。何今以下輩配下品耶。答。有三意。一約行因。善惡雖異。而位次輩品正同。三三成九故今取位不取行也。二下輩與下品。十念行同故。三五逆十惡而不謗者。亦攝下輩善人中故。大本云。地獄鬼畜生。亦生我刹中。墮地獄者。非五逆人而何。若下輩不攝。置於何輩耶。盡形持者。大本經云。一向專念無量壽佛。則知一生持也。九十日者。般舟三昧經云。九十日中。常行常立。一心繫念。於三昧中。得見阿彌。文殊般若云。九十日中。端坐西向。專念於佛。即成三昧。七七者。大集經云。若專念佛。至七七。日。現身見佛。一七者。彌陀經。觀經。皆云。一日乃至七日。即得往生。十日者。鼓音王經云。受持佛號。十日十夜。除捨

散亂必得見佛。大本云。一心常念。十晝夜不絕者。命終必生我刹。一日者。大本云。一心繫念於我。雖止一晝夜不絕。必生我刹。十念者。觀經云。其人苦逼。不遑念佛。十聲稱佛。即得往生。一念者。大本云。信樂不疑。乃至一念。念於彼佛。亦得往生。問云。何一念彼佛。亦得生彼國土。一聲彌陀。能滅八十億劫生死罪耶。答。一心朗念。積妄頓空。喻如一燈。能滅千年室暗。一火能燒百輛車薪。況乘如來本願功德。豈可思議耶。故法華云。一稱南無佛。皆以成佛道。佛名經云。一聞佛名。滅無量生死之罪。大悲經云。一稱佛名。以是善根。入涅槃界。不可窮盡。大莊嚴經論云。佛世一老人。來求出家。舍利弗等。俱不肯

度。以觀彼多劫無善根故。佛自度之。即證道果。因告大眾。此人無量劫前。爲採薪人。猛虎逼極。大怖上樹。稱南無佛。以是善根。遇我得度。況有下上。明自力。此明他力。自力復二。一者稱念彼佛力。如帆楫。二者本有佛性力。如舟船。他力即是佛願攝取力。如順風。三事周圓。必生彼土矣。問。佛即自來迎引。何又假多少化佛授手耶。答。顯其功行。有淺深故。如善導。千念而飛。千光少。康十聲而出。十佛華嚴離垢幢菩薩偈云。以佛爲境界。專念而不捨。此人得見佛。其數與心等。

(丁) 三結答圓通

佛問圓通。我無選擇。都攝六根。淨念相繼。得三摩地。斯爲第一。

隨初一句。牒所問。包含衆妙。曰圓。遍入諸有。曰通。又總攝萬化。不滯一隅。曰圓。統生一切。無有間隔。曰通。次五句。結能答我等四句。出本因。先因修。無選擇者。一揀非那律。選眼。空生擇意。二外不選六根相。浮勝二根相也內不擇六根性。見聞覺知性也根都攝者。對上亦二義。一眼不取色。乃至意不緣法。二唯依一精明心。不行六根用故。餘念不生。曰淨。念而無念故。一心繫佛。曰念。無念而念故。相繼謂事。則憶念無間。理則圓照無間。得句後。果證梵語三摩地。此云等至。等謂齊等。離沈掉故。至謂至到。到勝定故。亦云等持。謂平等持心。趣一境故。雖通因果。此且取功用中純熟一義。故名曰得。事則成念佛三昧。理則顯本。

性如來。斯爲句。歎殊勝。問。大本彌陀經云。極樂清淨。次於泥洹。今經揀選圓通。勢至念佛。次於觀音返聞。何稱爲第一耶。答。就楞嚴本經。有三意。一文殊謂念性生滅。因果殊感。故第二。勢至謂一心淨念。現見自佛。故第一。二阿難循聲。故返聞爲當根。念佛爲不當根。佛以聖性皆通。歸元無二。故稱觀音勢至。並無優劣。三此方教體。在於音聞。故以耳根圓通。當此方機。勢至居次。十方法門。念佛爲最。故以念佛圓通。當十方機。等於觀音。約念佛法門中。若事念他佛。助顯本覺性佛。則次泥洹。異於觀音。若理念自佛。直顯涅槃心佛。則等泥洹。同觀音矣。所謂不假方便。自得心開是也。如此念佛法門。不稱

第一而謂之何哉。修心者，豈可忽諸。

○牒所問者，楞嚴五卷云：我今問汝最初發心，悟十八界，誰爲圓通。從何方便，入三摩地。故此牒云：佛問圓通也。包含下、約包遍、釋圓通。又下、約攝生、釋圓通。又多門入一、一門容多、名之爲圓。如珠懸空，映於五色也。一入多門，多門容一，名之爲通。如泉潛流，穿於十方也。根都攝下，佛爲能攝，根爲所攝，攝則通二。二義中，初通事念，次通理念。上無擇二義，亦例此知之。等至下，圓覺疏，翻爲等至。等謂平等住持，雙離沈掉也。至謂能到勝定，及至勝位也。等持下，此依會玄記釋，事則成等至，理則成等持。故開二義也。問下，通妨也。慧覺曰：或謂淨

土、乃聖人之權方、所以接鈍根、化凡器也。苟能一超直入如來地、何藉於他力乎。答云。馬鳴、龍樹、天親等諸菩薩、皆發願往生、應盡是鈍根乎。釋迦於大寶積經、勸父王淨飯、并六萬釋種、皆求生淨土、應盡是凡器乎。一舉心念佛、即見性成佛、豈非一超直入乎。青草堂後身爲曾魯公、戒禪師後身作蘇東坡。真如喆公、後身多憂苦。太平古老、後身耽富貴。海印信禪師、生朱防禦家、爲子女。豈可單仗自力乎。若以此爲權、將何爲實。輕念佛者、可不慎歟。如此下、結顯也。若以念佛一門、攝生世出世法、言之爲五欲故、發心念佛、地獄界也。^一爲名利故、發心念佛、餓鬼界也。^二爲眷屬故、發心念佛、畜生界也。

三爲勝他故、發心念佛、修羅界也。四畏惡道故、發心念佛、人法界也。五求天樂故、發心念佛、天法界也。六欣涅槃故、發心念佛、聲聞界也。七慕無生故、發心念佛、緣覺界也。八欲度他故、發心念佛、菩薩界也。九希成佛故、發心念佛、佛法界也。十堅心念佛、地大也。十一喜心念佛、水大也。十二熱心念佛、火大也。十三勤心念佛、風大也。十四虛心念佛、空大也。十五靈心念佛、根大也。十六想心念佛、識大也。十七念佛旋見、眼根也。十八念佛反聞、耳根也。十九念佛轉嗅、鼻根也。二十念佛還嘗、舌根也。二十一念佛攝覺、身根也。二十二念佛逆知、意根也。二十三念佛觀像、色塵也。二十四念佛聽名、聲塵也。二十五念佛染香、香塵也。二十六念佛有味、味塵也。二十七念佛

光嚴、觸塵也。^{八二}念佛觀想、法塵也。^{九二}眼不別色、眼識念佛也。^{十三}耳不別聲、耳識念佛也。^{一三}鼻不別香、鼻識念佛也。^二舌不別味、舌識念佛也。^{三三}身不別觸、身識念佛也。^{四三}意不別法、意識念佛也。^{五三}怖生死苦、苦諦念佛也。^{六三}息諸惑業、集諦念佛也。^{七三}修戒定慧、道諦念佛也。^{八三}證寂滅理、滅諦念佛也。^{九三}煩惱不生、無明緣念佛也。^{十四}不作諸業、行緣念佛也。^{一四}不託母胎、識緣念佛也。^{二四}色心斷滅、名色緣念佛也。^{三四}諸根灰泯、六入緣念佛也。^{四四}根塵識離、觸緣念佛也。^{五四}不領前境、受緣念佛也。^{六四}不貪財色、愛緣念佛也。^{七四}不求塵欲、取緣念佛也。^{八四}業無有成、有緣念佛也。^{九四}不受後陰、生緣念佛也。^{十五}空無熟

壞、老死緣念佛也。一五一心念佛、萬緣自捨、施度也。二五一心念佛、諸惡自止、戒度也。三五一心念佛、心自柔順、忍度也。四五一心念佛、永不退轉、進度也。五五一心念佛、餘想不生、禪度也。六五一心念佛、正智分明、智度也。七五一心念佛、成正徧知、菩提也。八五一心念佛、常樂我淨、涅槃也。九五寂靜念佛、空如來藏也。十六想像念佛、不空如來藏也。一六圓通念佛、空不空如來藏也。二六日出念佛、先照時也。三六食時念佛、轉照初也。四六亭午念佛、轉照中也。五六晡時念佛、轉照後也。五六日沒念佛、還照時也。七六念心外佛、小教也。八六念心內佛、始教也。九六念即心佛、終教也。十七念非心佛、頓教也。一七念普融佛、圓教也。二七有佛有心、淨念相繼、

事法界也。^{三七}無佛無心、不假方便、理法界也。^{四七}念佛念心、入無生忍、事理無礙法界也。^{五七}若佛若心、遍含無盡、事事無礙法界也。^{六七}一念佛門、含無盡義、總相也。^{七七}四五義門、非一念佛別相也。^{八七}十六觀等、同成念佛、同相也。^{九七}依報清淨、非正莊嚴、異相也。^{十八}念佛一門、攬諸義成、成相也。^{一八}四種五種、各住自位、壞相也。^{二八}依正功德、念佛便周、同時具足相應門也。^{三八}遍周諸法、不離念佛、廣狹自在無礙門也。^{四八}一根念佛、六根都攝、一多相容不同門也。^{五八}念佛三昧、即一切法、諸法相即自在門也。^{六八}正念佛時、餘門不現、祕密隱顯俱成門也。^{七八}此念佛門、一切齊攝、微細相容安立門也。^{八八}五種念佛、互攝

重重、因陀羅網境界門也。^{九八}見念佛門、即見無盡、託事顯法
生解門也。^{十九}前後念佛、不異當念、十世隔法異成門也。^{一九}念
佛一法、帶無盡法、主伴圓明具德門也。^{二九}念自心佛、本覺也。
^{三九}念佛信心、始覺中名字也。^{四九}念佛解心、始覺中相似也。^{五九}
念佛證心、始覺中分證也。^{六九}念佛成佛、究竟覺也。^{七九}當念佛
時、寂寞無爲、法身佛也。^{八九}當念佛時、無德不具、報身佛也。^{九九}
當念佛時、凡聖並欣、化身佛也。^{百一}故知念佛一法、攝盡一切
法矣。

(甲) 三皈命回向

稽首釋迦彌陀佛。觀音勢至諸聖賢。仰願三寶加被力。令此經

疏遍塵刹。見聞隨喜及持說。畢竟得生安樂土。回此功德向法界。同成無上菩提果。

楞嚴經勢至念佛圓通章疏鈔卷下

音釋

遮那

此云徧一切處亦云光明徧照

瞪

音振直視也

瞢

音萌昏悶不了也

波利質多羅

此云圓生切利天樹花開香徧五十由旬又翻間錯莊嚴衆雜色花周匝

莊嚴故又云香徧樹根莖枝葉膚實莫不皆香故

蒼蘆

音詹旬此云黃色花最香形似蘆子花其樹高大

摩羅耶

翻高山或云牛頭亦云離垢

阿那婆達多

此云無熱惱池名也

阿盧那

此云赤色香名

羅刹

此云速疾鬼又云可畏暴惡

須夜摩

此云善時分時唱妙善樂故

兜率

華言知足於五欲境知止足故

先陀婆

此云石鹽其香似之鹽水器馬皆云先陀婆今應用鹽也

龍鍾

老病貌謂老來腰彎背駝猶如龍之鍾曲也

痾

音阿病也

楞伽

此云不可往山也佛在此說名楞伽經

羅漢

翻無生應供殺賊四果也

須陀洹

翻預流初果也

般舟

翻佛立常行三昧也

遑

音黃心不暇也

輔那律

音兩乘也華言無貧亦云如意

浮勝二根

謂浮塵根勝義根也六根中各具此二種

掉

音調去聲搖也

泥洹

即涅槃音轉耳此云入滅

十八界

六根六塵六識也

淨

大勢至菩薩念佛圓通章疏鈔

大勢至菩薩念佛圓通章疏鈔

一二二

飯

梵語闍頭檀亦翻
眞淨白淨王名也

詰

音折與
哲同

晡

音通
申時

因陀羅網

此云天
帝網

刻勢至疏鈔緣起

諸修行中、念佛爲最。念佛方法、莫尚此經。疏鈔之作、不容已也。戊午冬、京兆戴復齋先生、長公仁長、預祝乃翁壽。建華嚴會。予時首衆、諷至德雲念佛門、諦審沈觀。其夜夢本師和尚、爲講勢至章。比曉、細研清涼疏鈔。遂於臘月八日開釋。歷已未元宵閣筆。暨夏五月、齋本請教於復齋戴先生。今歲七月望、先生囑公郎募刻之。公郎喜而應命。即以此爲起疾延生之公據。壽增福益、足可徵也。梓人曰：是佛菩薩佑耶。非佛菩

薩佑耶。予曰。當知是經義不可思議。果報亦不可思議。所以然者。或開五欲樂。或闡六塵境。或爲聲名之蒿矢。或結世產之果因。如是施資鏤本。有損無益。今刻念佛法門。供一人。有一人之益。供千萬人。即有千萬人之益。在一時一處。則一時一處益。盡未來遍沙界。便有塵方億劫之益。此即力同勢至。願比彌陀。攝念佛人。歸安養土。其無漏功德。等於虛空。何可以心思言議耶。且旣得佛心。使三寶常住。佛不佑之。而誰佑歟。故此輕小之兆。不足疑也。衆以爲然。命作文勸世。普起一切人之信心。復翁先生聞之曰。茲事茫昧。不須遑舉。信心衆具。廣勸奚爲。予曰。不然。生死一大事也。其能脫之之法門。豈

曰小哉。信者雖多，莫能常遍。今表而出之，未信者令信。已信者令增。又何傷於轉勸乎。遂記此於疏鈔之末，爲流通一助云時。

康熙庚申年十月十一日灌頂行者續法題於慈雲觀堂

音釋

諷 音風去聲誦也

齋 音整持也又音咨義同俗作費又訛作資

蒿矢

即前茅弄引之意唐張巡欲射尹子琦莫能辨因剗蒿爲矢中者喜謂巡矢盡白子琦乃得其狀使南霽雲射之一發中琦左目出唐書

略論安樂淨土義

釋 曇鸞 撰

問曰。安樂國於三界中何界所攝。

答曰。如釋論言。如斯淨土。非三界所攝。何以故。無欲故。非欲界。地居故。非色界。有形色故。非無色界。經曰。阿彌陀佛本行菩薩道時。作比丘名曰法藏。於世自在王佛所。請問諸佛淨土之行。時佛爲說二百一十億諸佛刹土。天人善惡。國土精麤。悉現與之。於時法藏菩薩。即於佛前。發弘誓大願。取諸佛土。於無量阿僧祇劫。如所發願。行諸波羅蜜。萬善圓滿。成無上道。別業所得。非三界也。

問曰。安樂國有幾種莊嚴。名爲淨土。

答曰。若依經據義。法藏菩薩四十八願。卽是其事。尋讚可知。不復重序。若依無量壽論。以二種清淨。攝二十九種莊嚴成就。二種清淨者。一器世間清淨。二是衆生世間清淨。器世間清淨。有十七種莊嚴成就。一者國土相。勝過三界道。二者其國廣大。量如虛空。無有齊限。三者從菩薩正道大慈悲出世善根所起。四者清淨光明。圓滿莊嚴。五者備具第一珍寶性。出奇妙寶物。六者潔淨光明。常照世間。七者其國寶物柔軟。觸者適悅。生於勝樂。八者千萬寶華。莊嚴池沼。寶殿寶樓閣。種種寶樹。雜色光明。影納世界。無量寶網。覆虛空。四面懸鈴。常吐法音。九者於虛空

中、自然常雨天華天衣天香、莊嚴普熏。十者佛慧光明、照除癡闇。十一者梵聲開悟、遠聞十方。十二者阿彌陀佛無上法王、善力住持。十三者從如來淨華所化生。十四者愛樂佛法味、禪三昧爲食。十五者永離身心諸苦、受樂無間。十六者乃至不聞二乘女人根缺之名。十七者衆生有所欲樂、隨心稱意、無不滿足。如是等十七種、是名器世間清淨。衆生世間清淨、有十二種莊嚴成就。一者無量大珍寶王微妙華臺以爲佛座。二者無量相好無量光明莊嚴佛身。三者佛無量辯才、應機說法、具足清白、令人樂聞。聞者必悟解、言不虛說。四者佛真如智慧猶如虛空、照了諸法總相別相、心無分別。五者天人不動衆廣大莊嚴。六

者成就無上果、尚無能及、況復過者。譬如須彌山、映顯四大海、法王相具足。七者爲天人丈夫調御師、大衆恭敬圍遶、如師子王師子圍遶。八者佛本願力莊嚴住持諸功德、遇者無空過、能令速滿足一切功德海。未證淨心菩薩、畢竟得證平等法身。與淨心菩薩、與上地菩薩、畢竟同得寂滅平等。九者安樂國諸菩薩衆、身不動搖、而遍至十方、種種應化、如實修行、常作佛事。十者如是菩薩應化身、一切時不前不後、一心一念、放大光明、悉能遍至十方世界、教化衆生、種種方便修行所成、滅除一切衆生苦惱。十一者是等菩薩於一切世界、無餘照諸佛大會、無餘廣大無量供養恭敬讚歎諸佛如來功德。十二者是諸菩薩於

十方一切世界無三寶處、住持莊嚴佛法僧寶功德大海、遍示令解如實修行。如是等法王八種莊嚴功德成就。如是菩薩四種莊嚴功德成就。是名衆生世間清淨安樂國土。具如是等二十九種莊嚴功德成就。故名淨土。

問曰。生安樂土者、凡有幾品輩、有幾因緣。

答曰。無量壽經中。唯有三輩。上中下。無量壽觀經中。一品又分爲上中下。三三而九。合爲九品。今依傍無量壽經爲讚。且據此經作三品論之。上輩生者有五因緣。一者捨家離欲而作沙門。二者發無上菩提心。三者一向專念無量壽佛。四者修諸功德。五者願生安樂國。具此因緣。臨命終時。無量壽佛與諸大衆現

其人前。即便隨佛往生安樂。於七寶華中自然化生。住不退轉。智慧勇猛。神通自在。中輩生者有七因緣。一者發無上菩提心。二者一向專念無量壽佛。三者多少修善奉持齋戒。四者起立塔像。五者飯食沙門。六者懸繪然燈散華燒香。七者以此迴向願生安樂。臨命終時。無量壽佛化現其身。光明相好。具如真佛。與諸大衆現其人前。即隨化佛往生安樂。住不退轉。功德智慧。次如上輩。下輩生者有三因緣。一者假使不能作諸功德。當發無上菩提心。二者一向專意。乃至十念念無量壽佛。三者以至誠心願生安樂。臨命終時。夢見無量壽佛。亦得往生。功德智慧。次如中輩。又有一種往生安樂。不入三輩中。謂以疑惑心修諸

功德願生安樂。不了佛智、不思議智、不可稱智、大乘廣智、無等無倫最上勝智。於此諸智疑惑不信。然猶信罪福、修習善本、生安樂。生安樂國七寶宮殿。或百由旬。或五百由旬。各於其中受諸快樂。如忉利天。亦皆自然。於五百歲中。常不見佛、不聞經法、不見菩薩聲聞聖衆。安樂國土謂之邊地。亦曰胎生。邊地者。言其五百歲中。不見聞三寶。義同邊地之難。或亦於安樂國土最在其邊。胎生者。譬如胎生人。初生之時。人法未成。邊言其難。胎言其闇。此二名皆借此況彼耳。非是八難中邊地。亦非胞胎中胎生。何以知之。安樂國土一向化生故。故知非實胎生。五百年後。還得見聞三寶故。故知非八難中邊地也。

問曰。彼胎生者。處七寶宮殿中。受快樂否。復何所憶念。

答曰。經喻云。譬如轉輪王子得罪於王。內於後宮。繫以金鎖。一切供具無所乏少。猶如王。王子於時。雖有好妙種種自娛樂具。心不受樂。但念設諸方便。求免怖出。彼胎生者亦復如是。雖處七寶宮殿。有好色香味觸。不以爲樂。但不見三寶。不得供養修諸善本。以之爲苦。識其本罪。深自責悔。求離彼處。即得如意。還同三輩生者。當是五百年末。方識罪悔耳。

問曰。以疑惑心往生安樂。名曰胎生者。云何起疑。

答曰。經中但云疑惑不信。不出所以疑意。尋不了五句。敢以對治言之。不了佛智者。謂不能信了佛一切種智。不了故。故起疑。

此一句總辨所疑。下四句一一對治所疑。疑有四意。

一者疑但憶念阿彌陀佛、不必得往生安樂。何以故。經言。業道如秤、重者先牽。云何一生、或百年、或十年、或一月、無惡不造。但以十念相續、便得往生。即入正定聚、畢竟不退、與三途諸苦永隔乎。若爾、先牽之義何以可信。又曠劫已來、俱造諸行、有漏之法、繫屬三界。云何不斷三界結惑、直以少時念阿彌陀佛、便出三界乎。繫業之義復欲云何對治此疑。故言不思議智、不思議智者。謂佛智力、能以少作多、以多作少。以近爲遠、以遠爲近。以輕爲重、以重爲輕。以長爲短、以短爲長。如是等佛智、無量無邊、不可思議。譬如百夫百年聚薪、積高千仞、豆許火焚、半日便盡。

豈可得言百年之薪積、半日不盡乎。又如躡者寄載他船、因風帆勢、一日至千里。豈可得言躡者云何一日至千里乎。又如下賤貧人、獲一瑞物、而以貢主。主慶所得、加諸重賞。斯須之頃、富貴盈溢。豈可得言以可有數十年仕、備盡辛懃、上下尚不達歸者、謂彼富貴無此事乎。又如劣夫、以己身力、擲驢不上。從轉輪王行、便乘虛空、飛騰自然。復可以擲驢之劣夫、言必不能乘空耶。又如十圍之索、千夫不制。童子揮劍、瞬頃兩分。豈可得言一小兒力不能斷索乎。又如鳩鳥入水、魚蚌斯斃。犀角觸泥、死者咸起。豈可得言性命一斷無可生乎。又如黃鵠呼子安、子安還活。豈可得言墳下千歲齡、決無可甦乎。一切萬法、皆有自力他

力自攝他攝。千開萬閉、無量無邊。安得以有礙之識、疑彼無礙之法乎。又五不思議中、佛法最不可思議。而以百年之惡爲重、疑十念念佛爲輕、不得往生安樂入正定聚者、是事不然。

二者疑佛智於人不爲玄絕。何以故。夫一切名字、從相待生。覺智從不覺生。如是迷方、從記方生。若使迷絕不迷、迷卒不解。迷若可解、必迷者解。亦可云解者迷。迷解解迷、猶手反覆耳。乃可明昧爲異。亦安得超然哉。起此疑故、於佛智慧生疑不信。對治此疑、故言不可稱智。不可稱智者、言佛智絕稱謂、非相形待。何以言之。法若有、必應有知有之智。法若是無、亦應有知無之智。諸法離於有無、故佛冥諸法、則智絕相待。汝引解迷爲喻、猶

是一迷耳。不成迷解。亦如夢中與他解夢。雖云解夢。非是不夢。以知取佛。不曰知佛。以不知取佛。非知佛。以非知非不知取佛。亦非知佛。以非非知非非不知取佛。亦非知佛。佛智離此四句。緣之者心行滅。損之者言語斷。以是義故。釋論云。若人見般若。是則爲被縛。若不見般若。是亦爲被縛。若人見般若。是則爲解脫。若不見般若。是亦爲解脫。此偈中說不離四句者爲縛。離四句者爲解脫。汝疑佛智與人不玄絕者。是事不然。

三者疑佛實不能度一切衆生。何以故。過去世有無量阿僧祇。恆沙諸佛。現在十方世界。亦有無量無邊阿僧祇。恆沙諸佛。若使佛實能度一切衆生。則應久無三界。第二佛則不應復爲衆

生發菩提心、具修淨土攝受衆生。而實有第二佛攝受衆生。乃至實有三世十方無量諸佛攝受衆生。故知佛實不能度一切衆生。起此疑故、於阿彌陀佛作有量想。對治此疑、故言大乘廣智。大乘廣智者、言佛無法不知、無煩惱不斷、無善不備、無衆生不度。所以有三世十方者、有五義。一者若使無第二佛、乃至無阿僧祇恆沙諸佛者、佛便不能度一切衆生。以實能度一切衆生故、則有十方無量諸佛。無量諸佛、即是前佛所度衆生。二者若一佛度一切衆生盡者、復亦不應後有佛。何以故。無覺佗義故。復依何義說有三世佛乎。依覺佗義故、說佛佛皆度一切衆生。三者後佛能度、猶是前佛之能。何以故。由前佛有後佛故。譬

如帝王之甲得相紹襲、後王即是前王之能故。四者佛力雖能度一切衆生、要須有因緣。若衆生與前佛無因緣、復須後佛。如是无緣衆生、動逕百千萬佛、不聞不見。非佛力劣也。譬如日月周四天下、破諸闇冥、而盲者不見。非日不明也。雷震裂耳、而聾者不聞。非聲不勵也。覺諸緣理、號之曰佛。若情強違緣理、非正覺也。是故衆生無量、佛亦無量。徵佛莫問有緣無緣、何不盡度一切衆生者、非理言也。五者衆生若盡、世間即墮有邊。以是義故、則有無量佛度一切衆生。問曰：若衆生不可盡、世間復須墮無邊。無邊故、佛則實不能度一切衆生。答曰：世間非有邊、非無邊。亦絕四句。佛令衆生離此四句、名之爲度。其實非度、非不度。

非盡非不盡。譬如夢渡大海，值濤波諸難，其人畏怖，叫聲徹外。外人喚覺，坦然無憂。但爲渡夢，不爲渡河。問曰：言度與不度，皆墮邊見。何以但說度一切衆生爲大乘廣智，不說不度衆生爲大乘廣智？答曰：衆生莫不厭苦求樂，畏縛求解。聞度則歸向，聞不度，不知所以不度，便謂佛非大慈悲，則不歸向。不歸向故，長寢久夢，無由可息。爲是人故，多說度，不說不度。復次諸法無行，經亦言佛不得佛道，亦不度衆生。凡夫強分別，作佛度衆生，言度衆生，是對治悉檀。言不度衆生，是第一義悉檀。二言各有所以，不相違背。問曰：如夢得息，豈不是度耶？若一切衆生所夢皆息，世間豈不盡乎？答曰：說夢爲世間，若夢息則無夢者。若無夢

者亦不說度者。如是知世間即是出世間。雖度無量衆生。則不墮顛倒。

四者疑佛不得一切種智。何以故。若能徧知諸法。諸法墮有邊故。若不能徧知。則非一切種智故。對治此疑。故言無等無倫最上勝智。無等無倫最上勝智者。凡夫智虛妄。佛智如實。虛實玄殊。理無得等。故言無等。聲聞辟支佛欲有所知。入定方知。出定不知。又知亦有限。佛得如實三昧。常在深定而徧知。照萬法二與無二。深法非倫。故言無倫。八地已上菩薩。雖得報生三昧。用無出入。而習氣微熏。三昧不極明淨。形待佛智。猶爲有上。佛智斷具足。如法而照。法無量故。照亦無量。譬如函大蓋亦大。故言

最上。此三句亦可展轉相成。以佛智無與等者故。所以無倫。以無倫故。最上勝。亦可最上勝故無等。無等故無倫。但言無等便足。復何以須下二句者。如須陀洹智不與阿羅漢等。而是其類。初地至十地亦如是。智雖不等。非不其倫。何以故。非最上故。汝以知有邊爲難。疑佛非一切智者。是事不然。

問曰。下輩生中云。十念相續。便得往生。云何名爲十念相續。答曰。譬如有人。空曠迴處。值遇怨賊。拔刀奮勇。直來欲殺。其人勁走。視渡一河。若得渡河。首領可全。爾時但念渡河方便。我至河岸。爲著衣渡。爲脫衣渡。若著衣納。恐不得過。若脫衣納。恐無得暇。但有此念。更無他緣。一念何當渡河。即是一念。如是不雜。

心、名爲十念相續。行者亦爾。念阿彌陀佛。如彼念渡。逕于十念。若念佛名字。若念佛相好。若念佛光明。若念佛神力。若念佛功德。若念佛智慧。若念佛本願。無他心間雜。心心相次。乃至十念。名爲十念相續。一往言十念相續。似若不難。然凡夫心猶野馬。識劇猿猴。馳騁六塵。不暫停息。宜至信心。預自剋念。使積習成性。善根堅固也。如佛告頻婆娑羅王。人積善行。死無惡念。如樹西傾。倒必隨西。若使刀風一至。百苦湊身。若前習不在懷。念何可辨。又宜同志五三。共結言要。垂命終時。迭相開曉。爲稱阿彌陀佛名號。願生安樂。聲聲相次。使成十念也。譬如蠟印印泥。印壞文成。此命斷時。即是生安樂時。一入正定聚。更何所憂也。

略論安樂淨土義畢

音釋

適悅 尸亦反廣雅善也謂事物善
稱人心也下兩月反喜也
池沼 直离反停水曰池下
之繞反沼亦池也
影納 下奴答反
受也人也
映 英敬反考聲暉也說文
從日英聲別作映非

搖 曜消反
動也
傍 蒲浪反倚也
廣雅倚因也
繪 牆蠅反帛
之總名也
胞胎 巴交反兒生衣也下他
來反女人懷妊未生也
內 奴合反
與納同
金鑠 桑果反相
鈎連也從

小從貝別
作鑠非
秤 蚩陵反
銓也
牽 啓堅反
引也
曠劫 苦謗反
久遠也
仞 如振反爾雅四尺曰
仞論語註七尺曰仞
載 哉愛反
乘也
躄 必歷反兩足俱
廢不能行者

斯須 相咨反下相逾反謂
一離一合之頃也
溢 引一反盈
也餘也
辛勲 信津反艱苦曰辛下
渠中反與勲同勞也
擲驢 呈戟反投也下呂豬反
似馬而小長耳牛尾
騰 徒登
反跳

躍而
上也
揮 許歸反奮
也動也
瞬頃 舒閏反韻英動目也正作瞬俗
作瞬非下頤穎反考聲少選也
鳩 除禁反毒鳥也食腹蛇以
其毛歷飲食則殺人也
蟬 蒲項反
始也
斃 毗祭反
死也

黃鵠 胡木反玉篇黃鵠
形如鶴色蒼黃
墳 符分反封土
為塋曰墳
甦 孫租反死而更生也
正作蘇俗作甦非
玄絕 上胡涓反
幽遠也
甲 古洽反字書凡物首
出群類曰甲表忠觀

碑甲於
天下
紹襲 詔遠反繼也下
辭立反受也
逕 居慶反與經
通又至也
裂 良薛反
擊破也
勵 力滯反
強也
徵 涉陵反考聲責
也集訓求也
濤波 徒刀
反海

中大
波也
坦然 他祖反
安也
悉檀 悉徧也檀梵語也其云檀那
華云施華梵兼稱故云悉檀
函蓋 胡緘反以木器盛物也
下居大反覆也掩也
空曠 下苦謗反
廣大也

迥

筭穎反
遠也

勁

居盛反
健也

衣納

下奴答反
弊衣也

劇

其逆反
甚也

馳騁

直知反奔也下
丑領反走也

停

唐丁反
止也

尅

口得反字
林能也爾

雅勝也

頻婆娑羅

梵語也應法師云頻毗此云顏色娑羅此云端正或
言萍沙或言頻婆娑羅此云色像殊妙其義一也

湊

蒼候反
聚也

五方便念佛門

天台 智者大師 撰

一凝心禪。二制心禪。三體真禪。四方便隨緣禪。五息二邊分別禪。凡住心一境。名曰凝心。且如行者念佛之時。諦觀如來玉毫金相。凝然寂靜。了亮洞徹。名凝心禪。次前雖凝心。所習慣馳散。今制之令還。諦緣金相。名制心禪。復次前雖制心。得住定境。既非理觀。皆屬事修。今體本空。誰制。無佛無念。名體真禪。復次前雖謂體真。猶滯空寂。無量名相。昧然不知。今以無所得而爲方便。從空入假。萬相洞明。不爲空塵之所惑亂。名方便禪。復次體真。及以方便。各據空有不離二邊。今諦觀靜亂本無相貌。名言

路斷。思想亦絕。名息。二邊禪。從淺至深。如是分別。原夫圓觀。亦無淺深。而淺深宛然。敘開念佛五門。第一稱名往生念佛三昧門。第二觀相滅罪念佛三昧門。第三諸境唯心念佛三昧門。第四心境俱離念佛三昧門。第五性起圓通念佛三昧門。諸佛大慈悲。常教勅說法。諸菩薩等。以種種方便。令衆生易解。又自以種種方便。開示般若波羅蜜。以何義故。說是般若波羅蜜。佛言。欲令諸菩薩等增長念佛三昧故。以何因緣。令念諸佛。佛言。若念佛者。當知是人。即與文殊師利等無有異。以何故。此三昧者。諸佛世尊之所遊戲。首楞嚴等諸大三昧始出生處。是知將入諸佛法。方便誠多。若以一言而具衆門。無過念佛。所以者何。一

切賢聖皆從念佛而生。一切智慧皆從念佛而有。假如十信菩薩及三賢菩薩皆不離念佛念法念僧。乃至不離念一切種智。初地菩薩乃至八九十地菩薩亦不離念佛念法念僧。乃至不離念一切種智。但以念知差別。隨義立名。衆生迷名。妄生異解。漂墜魔界。遂輕念佛之名。仍謂已修。別爲勝業。爲愍此故。今略言之。若論修因之人。不離三賢十聖。若論證果之者。即是諸佛如來。修因之人。繫心常思念十方一切佛。證果之者。又特啓此以爲微妙清淨第一禪。是知易入而證深。無過念佛。嗟乎。末學之流。輕其易入。失其證深。爲見所縛。良可悲矣。又諸佛以衆生樂稱諸佛名。生彼國者。則示以稱名往生門。衆生有樂覩諸佛。

身懼障不見者。則示以觀相滅罪門。衆生有迷心執境者。則示以諸境唯心門。衆生有計實有者。則示以心境俱離門。衆生樂深寂定。趣無生滅者。則示以性起圓通門。大哉世尊。善拔我等。開示一道。直至菩提甚深法門。所謂念佛。唯有大智度者。生而知之者。深修定慧者。善經論者。請檢此門。與了義大乘等經。有收義不盡處。請試言之。是知稱一佛名。智深則深。一言而具衆門。信有徵矣。既敘五門來意竟。更敘入方便次第。假如行人口稱南無阿彌陀佛時。心必願生彼國土。即是稱名往生門。行者想像佛身。專注不已。遂得見佛光明。赫奕照觸。行者爾時所有罪障。皆悉消滅。即是觀相滅罪門。又觀此佛。從自心起。無別境。

界。即是諸境唯心門。又觀此心亦無自相可得。即是心境俱離。門行者爾時趣深寂定。放捨一切心意意識。將入涅槃。蒙十方佛加被護念。興起智門。行者爾時於一念頃淨佛國土。成就衆生。如何前四門所有功德百千萬分。不及其一。何以故。無功用位。能以一身爲無量身。任運修習故。佛觀護故。諸佛法源。盡窮底故。普賢願因。悉圓滿故。本願力故。法如是故。即是性起圓通門。已上五門竟。

問云。何爲一行三昧。答。大寶積經第一百一十六云。文殊師利白佛言。世尊。當云何修行。能速得阿耨菩提。佛言。一行三昧。善男子。善女人。修是三昧者。速得阿耨多羅三藐三菩提。文殊師

利言云。何名一行三昧。佛言。法界一相。繫緣法界。是名一行三昧。若善男子。善女人。欲入一行三昧。當先聞般若波羅蜜。如說修行。然後能入一行三昧。如法界緣。不退不壞。不思議無礙無相。善男子。善女人。欲入一行三昧。應處空閑。捨諸亂意。不取相貌。繫心一佛。專稱佛名字。隨佛方所。端身正向。能於一佛念念相續。即是念中。能見三世諸佛。何以故。念一佛功德。無量無邊。亦與無量諸佛功德。無異無別。如是入一行三昧者。盡知恆沙諸佛法界。無差別相。此文良證。

問曰。人多畫像。而以觀禮。有何聖教。答。大寶積經第八十九云。爾時大精進菩薩。持畫佛巖像。入於深山。寂靜無人。禽獸之間。

開現畫像。取草爲座。在畫像前。結跏趺坐。正身正念。觀於如來。諦觀察已。作如是念。如來是希有微妙。畫像尚爾端坐微妙。況復如來正遍知身。復作是念。云何觀佛。爾時林神知彼菩薩心之所念。白菩薩言。善男子。汝念云何觀佛。答言。若欲觀佛。當觀畫像。觀此畫像。不異如來。是名觀佛。如是觀佛。如是觀者。是爲善觀。時大精進作如是念。我今云何觀此畫像。與如來等。復作是念。如是畫像者。非覺非知。一切諸法。亦復如是。但有名字。如是名字。自性空寂。本無所有。如來之身。其相如是。畫像非證。非果。非證者。非得者。非住者。非去來。非生非滅。非淨非色。非貪瞋癡。畫像非陰界入。非初中後。一切諸法。亦復如是。如來身相。亦

復如是。如此畫像非覺非知非作。一切諸佛亦復如是。觀如來身相亦復如是。乃至六根亦復如是。菩薩如是。觀如來身。結跏趺坐。於三七日中。成就五通。供養諸佛。諸天散華。以爲供養。爲佛所讚。會中二萬人住阿耨多羅三藐三菩提。無量阿僧祇人住二乘功德。大精進者。釋迦牟尼佛是也。此文明矣。約四教者。夫心不獨生。必托緣起。行者念佛之時。意想爲因。如來毫光爲緣。亦名法塵。以對意根故。所起之念。即是所生法。觀此根塵能所。三相遷動。新新生滅。念念不住。分析方空。無佛無念。藏教小乘也。即觀念佛心起。能生所生。無不即空。妄謂心起。心實不起。起無自性。體之即空。所觀佛相。如鏡中像。虛空華。無佛無念。通

教大乘也。即觀念佛心起。即假名之法。淺深洞鑒。無量名相。如
觀掌中了。知此心有如來藏。歷劫斷惑。方證眞常。離邊顯中。無
佛無念。別教大乘也。即觀念佛心起。即空假即中。若根若塵。並
是法界起。一念亦爾。塵刹諸佛。一念照明。六道衆生。刹那普應。
初即是後。今始覺知。如大福人。執石成寶。必無捨念。別求離念。
即邊而中。無佛無念。圓教大乘也。瓔珞經明。頓悟如來。此之謂
也。

五方便念佛門一卷

五方便念佛門

蕩益大師開示念佛法門

念佛法門、別無奇特、只深信力行為要耳。佛云：若人但念彌陀佛、是名無上深妙禪。天台云：四種三昧、同名念佛、念佛三昧、三昧中王。雲棲云：一句阿彌陀佛、該羅八教、圓攝五宗。可惜今人、將念佛看做淺近勾當、謂愚夫愚婦工夫。所以信既不深、行亦不力、終日悠悠、淨功莫剋。設有巧設方便、欲深明此三昧者、動以參究誰字為向上。殊不知現前一念能念之心、本自離過絕非、不消作意離絕。即現一句所念之佛、亦本自超情離計、何勞說妙譚玄。祇貴信得及、守得穩、直下念去、或晝夜十萬、或五萬三萬、以決定不缺為準。畢此一生、

誓無變改。若不得往生者、三世諸佛便為誑語。一得往生、永無退轉、種種法門、咸得現前。切忌今日張三、明日李四。遇教下人、又思尋章摘句。遇宗門人、又思參究問答。遇持律人、又思搭衣用鉢。此則頭頭不了、帳帳不清。豈知念得阿彌陀佛熟、三藏十二部極則教理、都在裏許。千七百公案、向上機關、亦在裏許。三千威儀、八萬細行、三聚淨戒、亦在裏許。真能念佛、放下身心世界、即大布施。真能念佛、不復起貪瞋癡、即大持戒。真能念佛、不計是非人我、即大忍辱。真能念佛、不稍間斷夾雜、即大精進。真能念佛、不復妄想馳逐、即大禪定。真能念佛、不為他歧所惑、即大智慧。試自簡點、若身心世界猶未放下、貪瞋癡念猶自現起、是非人我猶自挂懷、

閒斷夾雜猶未除盡、妄想馳逐猶未永滅、種種他歧猶能惑志、便不為真念佛也。要到一心不亂境界、亦無他術。最初下手、須用數珠、記得分明、刻定課程、決定無缺。久久純熟、不念自念、然後記數亦得、不記亦得。若初心便要說好看話、要不著相、要學圓融自在、總是信不深、行不力。饒汝講得十二分教、下得千七百轉語、皆是生死岸邊事。臨命終時。決用不著、珍重。

南無阿彌陀佛

回向偈

願以此功德
莊嚴佛淨土
上報四重恩
下濟三途苦
若有見聞者
悉發菩提心
盡此一報身
同生極樂國

〈 免 費 結 緣 · 敬 請 愛 護 珍 惜 〉
〈 歡 迎 翻 印 · 功 德 無 量 〉

大勢至菩薩念佛圓通章疏鈔

印贈者—香光淨宗學會

電話：(02) 851-0955

傳真：(02) 851-0953

地址：台北縣三重市中興北街179號1樓

淨空法師—淨空法師專集網站 <http://www.amtb.org.tw>
影音網址

淨空法師專集簡體網站 <http://www.amtb.cn>

淨空法師英文網站 <http://www.chinkung.org>

排版承印—和裕出版社

電話：(06) 2454023-7

中華民國九十五年三月恭印壹仟冊結緣
佛曆二五五〇年

真誠
清淨
平等
正覺
慈悲



看破
放下
自在
隨緣
念佛

本會法寶·免費結緣·絕無託人募款義賣·敬請明察·愛護珍惜

Printed in Taiwan(This book is not to be sold.)
FOR FREE DISTRIBUTION